




8



遺民詩序

當天步移易之際天之生才反獨厚而人之稟受者亦不一其剛烈清正之氣大則發為死事之忠臣次則蘊為肥遯之志士死事者名垂青史固無論已獨是肥遯者斂迹巖穴一往不返或為袁閔而土室自封或為范粲而柴車終老或為唐珏謝翱而夜哭西臺涕灑冬青甚或戢影方外如雪菴和尚之流類皆胸蘊英竒不克見之行事不得已而寄之于言況既謝絕塵事自畢力學問其所纂著俱堪風世雖曰身將隱



矣焉用文之諸君子固無意于流傳而彼為造化者豈肯閉塞所稟受之氣而使其所蘊之英竒泯没于天下後世乎此諸君子往往有詩歌存於宇內者也第生谷異地遺詩渙散不盡昭昭於耳目間近者易于搜羅遠者難于畢集久之能保其無傳流湮没之不齊者歟予竊謂諸君子之始迹雖不倫要其歸則心皆不貳實所謂同類也同類則當使其相聚其間有性情孚而交稱莫逆者亦有山川間之而托諸神交者余多方搜採久而成集而諸君子之詩為之一

聚則諸君子之性情亦為之一聚其稟諸大造之氣蘊而未盡洩之竒當亦為之一聚如聞歌泣大息于一堂各吐其胸臆而無間使天下後世皆得而窺見之豈非一大快乎寶香山人卓爾堪序

遺民詩凡例

十則

茲集名遺民詩自顯仕以及布衣咸曰遺民
祖魯論敘列逸民虞仲國君展禽士師與
朱張少連並稱之義也且前人有長留天
地間集又有遺民錄皆仕隱相間則此亦
不必區而別之

不立小傳以詩既稱遺民高其義也其間雖
有事功顯達于前者史傳已載不必臚列
至于下吏末僚孝廉茂才以及草茅韋布
遯世之迹既已相類立言恐涉雷同不必

漫效列朝詩選一人一傳然讀其詩梗槩當自見耳惟于目錄中畧書出處

不加圈點并不載評語圈點固不合古評語尤不敢輕以諸君子之詩多近變風變雅旨趣所在卽間窺及亦難言之

詩最多者諸體必備俾讀者得窺全豹然必於諸體中擇其所長者多錄之其所短者間登一二焉

遺民惟重末路苛求其他吾則何敢人與詩並重然人更重于詩其有以人傳詩

者詩不過數首雖有微瑕亦所必錄

詩所尚不同有雄渾高老者有清新綺麗者惟善是擇能兼有者亦兼錄之不繩一律詩題亦所最重況當易世之際紀忠紀烈紀事等詩雖有小疵未敢盡棄

傳世之作人生平無幾貴精不貴多但欲悉諸公生平涉歷并末路懷抱以暢心目非多錄不可若俱楓落吳江亦奚貴焉

俱選已往遺民之詩得詩卽梓先後故無詮次其間有得其全集選至百數十首者其

遺民詩
二
餘未見全稿或僅得數首或數十首者姑就所見錄之俟覓得全稿選入再見中至耳目所未逮正在訪求補入四方同志倘有留心收錄者敢懇郵筒惠寄以便續選入集不致憾于遺漏

遺民詩目錄

凡例有二畧紀諸公出處于目錄中俟竣易此

卷一

姜 埰	張 怡	黃周星	萬壽祺
傅 山	梁以樟	李 清	王猷定
呂大器	徐 枋	范鳳翼	顧夢游
杜祝進	湯燕生	費經虞	余 畚
王光承	黃宗羲	賈開宗	李孔昭
董 樵	岑 徵	徐 介	

卷二

杜 濬	喬可聘	宮偉鏐	黎遂球
-----	-----	-----	-----

孫奇逢 韋人鳳 徐開任 王應熊
孫兆祥 顧祖禹 王烈 陳子升
孫治

卷三

閻爾梅 李顥 李栢 魏禧
李瀚 楊焯 余懷 魏憲
李實 卓發之 吳騏 張養重
劉道開 徐波 沈士柱

卷四

錢澄之 湯來賀 葛一龍 胡介

王貴一 沈士尊 李沛 戴重
涂大酉 張彥之 苗君稷 陸圻
劉養貞 錢穀 胡玉昆

卷五

申涵光 姜垓 顧炎武 劉城
冒襄 宋曹 甘京 史玄
張自烈 林古度 唐階泰 楊葵
陳濟生 嚴熊 王璜 雷士俊
芮城 湯潛 靳應昇 柴紹炳
俞國賢 沈淑宏 吳拱宸

卷六

陳恭尹 方以智 曾燦 劉文昭
費密 顧有孝 韓畱 高兆
陸世鑿 潘問奇 王巖 魏憲星
胡春生 洪瀛

卷七

屈大均 鄒之麟 方文 顧景星
戴本孝 陸堦 卓汝立 楊靜
魏衛 余颺 陳允衡 趙司鉉
陳廷會 俞粲 汪蛟 趙島

卷八

顧士吉 于璜 韓田 徐增
惲本初 馬紹愉 程智 沈蘭先

吳嘉紀 呂潛 俞南史 姜梗

顧夢麟 李潛 魏禮 計南陽

談允謙 程邃 張穆 唐允甲

楊禹甸 趙士喆 錢滙 余增遠

陶澂 傅眉 陳盟 陸廷掄

龔賢 王邦畿 馮班 陸繁昭

卷九

吳 姓 李 沂 錢邦苞 汪 颯
金俊明 宋儒醇 李世熊 李永周
張 惣 蔣 易 汪 薌 吳 琦
歸 莊 范廷瑞 孟 鼎 劉 易
錢德震 姚 康 潘 陸 吳元辰
譚 宗 王龍文 林時益 卓發之
薛 宋 沈叔培 王鳴雷 迮 俊
江國茂

卷十

李鄴嗣 彭士望 蔣世紀 邢 昉

沈壽民 杜紹凱 蔣 洵 胡從中
何 聚 朱之臣 周 斯 崔干城
張雅度 姜安節 吳 鉏 董道權
吳懋謙 潘 紱 湯祖武 戴 易
邵 潛 丘維屏 徐 芳 惲日初
崔子忠 李恆煇 陶 葉 王 民
王 壘 王方岐 朱 璽 徐 柯
張 蓋 沈壽容 汪 颯 盧 生
朱 祐 周茂蘭 周蓼邨

卷十一

許承欽 紀映鍾 陳瑚 王玄度

宗元豫 朱爾邁 魏世傑 方兆曾

葉彌廣 顧苓 徐崧 徐士俊

陳周 趙述先 李蘅 李長盛

是名 孫默 查士標 王崇謙

徐開任再見 劉道開再見 張養重再見 談長益再見

鄒之麟再見 趙庶先再見 八大山人 王弘撰

徐夜 吳紹奇 楊大郁 王玉機

胡虞逸 戴易再見 張益再見

卷十二

釋函可 釋圓悟 釋今釋 釋圓信

釋讀徹 釋弘儲 釋戒顯 釋正崑

釋南潛 釋大依 釋澗挺 釋常岫

釋本體 釋大健 釋函昱 釋通復

釋興機 釋本月 釋智舷 釋行悅

釋弘修 釋寂燈 釋弘濟 釋阿眎

遺民詩捐梨棗姓氏

卷一

卷二

許葵菴

孝思

又米

蔚南

非池

蒼城

卷三

張印宣

象巖

魯文

右淳

卷四

程松臯

我清

卷五

石濤 范兩奇 吳馨聞 張山來

張虞廷 蕭徵义

卷六

宋崔岑 宋嵩南 江天玉

江搢五

卷七

鄭東邑 汪周士

卷八

俞錦泉 陳方 師巖 田右君

卷九

蔡瞻民 李久于 程退夫 許荔生

黃仲賓 韓章遠 周子容 錢善士

卷十

樂雲杼 卞夢齡 卞用齡 樂建三

樂持國 黃天儀

卷十一

卷十二 釋

中州 閔大臨 在東

遺民詩卷第一

寶香山人 卓爾堪 子任選輯

姜 埰

如農鄉墅山東萊陽人
敬亭集

和陶停雲

停雲停雲淒兮以雨寒魚聚沫伊于誰阻游覽
天末一室獨處車馬粼粼寧不我佇

今日何日春雨濛濛魚龍夜吼波送九江念我
良朋笑傲北牕道阻且長誰能往從

河柳青青及春而榮萬里之外所信人情我日
斯邁而月斯征雖有兄弟敢忘友生

東園之木偃卷成柯上有好鳥載鳴載和嗟我
懷人視此孰多自少及老相見幾何

和陶時運

農人出門于彼清朝薄言從之在此山郊翠雲
崇靄素輝揚霄告我農人別莠與苗

大河洋洋可以飲濯萬木颺榮四面延矚富貴
無能人老易足日月逝矣云胡不樂

行行故鄉于彼青沂鳥鳴舊林人老安歸嗟我
時命涕泗交揮黃農虞夏邈矣莫追

曰歸曰歸十洲之廬四海雖大我將焉如仙人

王喬騎鶴蓬壺學仙不成人莫嗤余

和陶榮木

南山有木夢藟于茲采薪采薪斧柯及之嗟我
少年得意幾時縱不得意誓所樂而

南山有木其下託根嗟我不如一樹焉存昔人
有志棲遲衡門今我何如惟道是敦

我有我廬俯仰何陋今我來思門巷已舊吁嗟
已矣誠不以富靜言懷之中心是疚

先聖有命余不敢墜天不敢欺人亦可畏譬如
駑馬愧彼良驥黽勉及時為善期至

詠史 二首

楚王好射獵有兒自南來射兒兒當死左右盡
驚摧顧謂安陵君萬歲奉參陪少年爭歡愛白
首與之偕譬彼雙鴻鵠天宇共徘徊中道勿相
棄棄之使人哀

豫讓本英特忠貞固其情趙孟為國仇仗劍宮
門行心念舊恩德不在君死生行乞既隱忍伏
橋志不成攬衣三躍劍殿陛盡為驚借問欲何
為聊以展中誠讐者亦歎息殺之成大名當時
列侯間聞風起悲聲身死貴有道臣心則已傾

秋懷

我有五絃琴撫之激清商撫罷還獨坐寒雲忽
蒼蒼芳時既已歇浩思慘不揚形變時故化情
多心易傷人生不得意四節皆淒涼西風牽我
衣百蟲鳴我牀一夜不能寐攬衣起徬徨
兒女列我前晨起向我悲問兒悲何事九月尚
衣絺衣絺猶自可無食腹中飢時我聞兒語淚
下不可持出門向故人乞穀復乞絲故人在何
處轉側反自疑君子守故轍毋乃見者嗤

做行路難 五首

君不見失匹鳥東西自飛飛君不見繫檻猿怒
號且啼飢千人萬人皆如此低頭煩冤但歛歛
古來窮達固有命那能眼見萬事非驅馬辭家
出門去長路漫漫將安歸

君不見堂前燕舊巢落泥心眷戀君不見鞦韆上
鷹一飽飛掣志驕矜座中三千皆食客酒肉如
山太狼籍一朝失勢去國門昔何繁盛今蕭索
君不見牆頭花花開華落徧人家君不見陌上
桑春天縹絲縷縷長夫壻已死交河戎賤妾不死
心亦傷空房黯黯嘗落淚況復重見嫁衣裳

君不見山中石堅貞永不易君不見澗底蘭采
之貽所歡張陳意氣苟期許何得勢利相摧殘
縱有讒言生猜間無那君心竟自安

君不見道旁草春風幾時好君不見霜下枝落
葉故垂垂人生十年不相見轉眼白髮顏色衰
回頭少年行樂日誰能寂寞及老時

發使東歸

四首選二

臘月來時黃河水二月歸家春水生前船欲招
後船去搔首不行是何故

西山盜賊真纏緬防家無有三尺犬莫言盜賊

好殺人養犬不利且自信

戍所

垂死承恩譴天威咫尺間荷戈荒徼去收骨瘡
江還袞職猶思補龍髯竟絕攀先皇千滴淚獨
在敬亭山

雜詠

老去人猶在春來客未還側身天地外卜宅野
雲邊月照歸棲鳥江喧出口船苦遭生意短白
髮不相憐

歌哭何曾是誰堪淚眼窮思吳失張翰化蜀愧

文翁百戰千家在三年一字通白華常有恨憑
着馬頭東

送董樵自姑蘇之南昌兼懷趙使君

故人馬首恨忽忽水驛春生雪乍融瓜步萬條
烟柳日潯陽九派布帆風幾多白髮交遊裏無
數青山欵乃中若使見君應問訊江東卧病鹿
皮翁

客宣城作

仙掌芙蓉聳碧霄屏間雲母欲迴飈遙天清境
臨山閣細雨春帆過板橋十里樓臺江淼淼六

朝文物草蕭蕭瑤華芳席多勞友詞客羈人未
寂寥

表公渡

沙岸縈迴渡口村斷橋幾曲水當門夕陽明滅
無人處一帶平川沒柳根

張怡

又名遺瑤星白雲江南江寧人

入山聞鶯

探幽幽谷裏恰有一鶯啼野水明山麓好峰當
澗鹵白雲專巨壑綠樹羃千谿不識靈巖路行
行轉欲迷

白雲洞

點埃無着處于此宿歸雲出岫為霖雨棲巖正
夕曛靜疑山鬼嘯榻與老僧分別自為天地鐘
聲下界聞

六十初度詩

九首選二

當年執戟侍明光親見彤雲捧玉皇萬國盡瞻
開大業一人遽忍棄多方鐘聲無復傳長樂花
氣猶疑出建章不分簾鉤雙燕子喃喃只似說
興亡

蓼莪讀罷更傷神手澤都歸一聚塵幸是家留

清白字可堪老作亂離人無能光顯生多愧每
念烝嘗志未伸得似兒時依膝下從他啼笑總
天真

登岱

玉簡金書事渺茫神房阿閣蹟全荒老松死不
櫻秦爵御嶂名猶誌宋皇石上寫經雲氣護池
邊濯月水痕香當年輦道迷荒草賸有寒鴉噪
夕陽

西關丈人峰

西關峨峨綴碧苔摩娑拄杖撥蒿萊孤峰箕踞

如人坐雙岫崔巍似幃開馮翊從來稱右輔長
庚原自接中台更從石壁看題字知有人曾載
酒來

由新盤路而下

盤路新開道又更我來冉冉踏空行下臨絕壑
無疆界仰視諸峰自縱橫洞口白雲時縷縷磧
中流水忽琤琤此來愧乏金錢供惟有神羊不
世情

黃周星

九烟湖廣湘潭籍江寧人
夏為堂詩

楚州酒人歌

酒人酒人爾從何處來我欲與爾一飲三百杯
寰區斗大不堪容我兩人醉直須上叩閭闔尋
蓬萊我思酒人昔在青天上氣吐長虹光萬丈
手援北斗斟天漿天厨絡繹供竒釀兩輪化作
琥珀光白榆歷歷皆杯盞吸盡銀河烏鵲愁黃
姑渴死哀清秋酒人咄咄渾無賴乘風且訪崑
崙丘綠娥深坐槐眉下萬樹桃花覆樽竿穆滿
高歌劉徹吟一見酒人皆大詫雙成長跪進三
觴大嚼絳雪吞玄霜桃花如雨八駿叫春風浩
浩心飛揚瑤池雖樂崦嵫促阿母綺牕不堪宿

願假青鳥探瀛洲列真酣飲多如簇天下無不
讀書之神仙亦無讀書不飲酒之神仙神仙酒
人化爲一相逢一笑皆陶然陶然此醉堪千古
平原河朔安足數瑤羞瓊糜賤如齏蒼龍可鱉
麟可脯與酣瞪目叫怪哉海波清淺不盈杯排
雲忽復干帝座撞鐘伐鼓轟如雷金莖傾倒沆
瀣竭披髮大笑還歸來是時酒人獨身橫行四
天下上天下天如龍馬百靈奔蹶海嶽翻所向
無不披靡者真宰上訴天帝驚冠劍廷議集公
卿今者酒人有罪罪不赦不殺不可殺之反成

酒人名急救酒人令斷酒酒人惶恐頓首奏陛
下臣有醉死無醒生帝顧巫陽笑扶酒人去風
馳雨驟蒼黃謫置楚州城酒人墮地頗狡獪讀
書學劍皆雄快白晢鬢鬢三十時戲掇青紫如
拾芥生平一飲富春渚再飲鸚鵡湖手板腰章
束縛苦半醒半醉聊枝梧誰知一朝乾坤忽翻
覆酒人發狂大叫還痛哭胸中五嶽自峩峩眼
底九州何蹙蹙頭顱頓改甕生塵酒非酒兮人
非人椎廬破觚吾事畢那計金陵十斛春還顧
此時天醉地醉人皆醉大夫獨醒空憔悴從來

酒國少頑民頌德稱功等游戲不如大詔天下
酒徒牛飲鼈飲兼囚飲終日酩酊淋漓嬉笑怒
罵聊快意請與酒人構一凌雲爍日之高堂以
堯舜為酒帝羲農為酒皇淳于為酒霸仲尼為
酒王陶潛李白坐兩廡糟壇餘子蹲其傍門外
醉鄉風拂拂門內酒泉流湯湯幕天席地不知
黃虞與晉魏裸裎科跣日飛觴一斗五斗至百
斗延年益壽樂未央請為爾更召西施歌虞姬
舞荆卿擊劍禰生搥鼓玉環飛燕傳觥籌周史
秦宮奉壘甌與爾痛飲三萬六千塲下視王侯

將相皆糞土但願酒人一世二世傳無窮令千秋萬歲酒氏之子孫人人號爾酒盤古酒人聞此耳熱復顏酡我更仰天嗚嗚感慨多卽今萬事不得意神仙富貴兩蹉跎酒人酒人當奈何噫吁嘻酒人酒人當奈何爾且楚舞吾楚歌

垂虹橋新漲歌

亦不必觀錢塘潮亦不必觀廣陵濤但看垂虹五月漲吳江之水勢何高我來吳江凡幾度時見微波落楓樹前年始至登長橋垂虹亭子聊縱步是時正值大滂餘水痕刻畫浸橋柱間殫

為河蛟龍遊民其魚乎公無渡今年聞說鳩僦功重復故道濬吳淞長橋側畔盡開闢一碧萬頃青天空蝟蝓蜿蜒五千尺垂虹此日真垂虹我聞此語心踴躍恨不飛棹江城角何期文酒有竒緣竭來正逢六月朔高堂讌會筵羣賢星羅霧合霏雲烟如茶如墨復如火困車龍馬紛駢闐解衣盤礴競砥筆慘澹經營寂不喧是時羲輪正卓午滿座荷香風栩栩忽然頭上黑雲橫狂飈颯颯驅獰雨祝融纔收火龍鞭列缺更佐豐隆鼓詞人拍手酒人歌金鐵縱錚百靈舞

我時魁跣坐高堂同心之友勸傾觴龜茲却奏
飛龍鳳絲竹嘈囀夜未央初期讌罷徐觀漲誰
知雷雨復震蕩高堂幾欲化長橋庭階三尺飛
鯨浪詰朝徒侶遽言歸回首垂虹空悵快我嘗
作客徧九州洞庭彭蠡幾回遊比年朝暮泛笠
澤莫釐縹緲兩鳧鷗九天雲垂海水立談笑如
乘竹葉舟況復松陵家咫尺乘興何妨便遨遊
直須枚叔觀濤日重看吳江八月秋

六月六日登洞庭西山縹緲峰放歌

噫吁嘻怪事哉洞庭一水三萬六千頃中有兩

山磅礴而崔嵬西山之巔曰縹緲自有此峰登
者不知幾萬輩誰曾六月六日來我來亦非愛
觸熱因緣意外真竒絕梁谿有客乘興遊中宵
命棹何勇決曉發膠山夕誇塘詰朝一葦凌蒼
茫火雲燒空風色靜雙櫓咿軋水中央七十二
峰紛出沒日晡始艤西山旁舉頭便見蒲萄綠
頓令煩暑化清涼從茲綠者不一狀千綠萬綠
森相望家家橘柚戶桑麻遊人步步行圖障叟
童雞犬寂無喧別有天地疑巢軒世人不信桃
源記誰知此是真桃源真桃源人罕見水如垣

山如殿神仙窟宅尊羽衲津梁倦老殺姑蘇城
裏人何曾一識西山面我來終是苦驕陽搜竒
討勝空徬徨道逢樵牧爭笑詫何物襜褕走顛
狂一遊林屋洞隔凡幽溼窅如夢再遊石公山
劍樓雲嶂聊躋攀包山好閣環空翠歸雲盤石
猶等閒三遊西湖寺寺外松杉中荷芟其日炎
威倍赫曦僕夫蹙蹙何況瘁入門總拚高枕休
王侯相喚不回眸忽聞縹緲在寺側起舞仍作
登山謀各向山僧乞杖笠同遊七人四人留余
與二客賈勇上倏忽便到孤峰頭俯瞰衆山皆

培塿茫茫震澤連天浮東望虎阜西望荆溪南
望茗霽北望梁溪四顧拍手大叫何不乘風便
飛去乃猶戀此腥腐齷齪區區九點之齊州噫
吁嘻怪事哉縹緲峰頭六月六日來長安貴人
渴欲死名車利馬走虺隤余與二客坐天際剛
風颯颯浮雲開披襟散髮那知暑恨不一飲千
百杯三島十洲在何許下視塊蘇真可哀噫吁
嘻怪事哉縹緲峰頭六月六日胡為來噫吁嘻
快事哉縹緲峰頭六月六日胡不來

秋日與杜子過高座寺登雨花臺

被髮何時下大荒河山舉目共淒涼客來古寺
談秋雨天爲幽人放夕陽去國屈原終婞直無
家李白只狺狂百年多少憑高淚每到西風灑
幾行

秋日獨登觀象臺望故宮及功臣廟一

帶遺址

獨來獨往意何如羈客心孤意不孤落日河山
千古在秋風天地一人無英雄感慨麒麟閣神
鬼睥睨燕雀湖高處不須搔首問碧翁大事久
糊塗

萬壽祺

年少江南徐州人
隰西草堂詩

南村雜咏

築圃南湖西淮流灌其下仲冬天氣晴飄霜不
盈瓦凌晨提甕行行行適大野綆短苦長汲甕
勉慚力寡

冉冉巖上竹停雲相因依粲粲江中石白日不
轉移我行涉其野蘭茝恒滿持非不愛其香辨
貴無人時上山常苦危下山常苦迫東園桃李
花不若山中柏

隰西草堂詩

老病移淮市擔簦稱道民乾坤悲晚歲山水憶
前身芳草舟車路桃花秦漢人冥冥謝弋者鴈
羽在沉淪

過京口鄔大繼思

不見鄔生久重來懷舊游江風驅斷鴈海霧壓
沉牛漁獵荒城晚兵戈古戍秋傷時一樽酒明
月夜登樓

忽憶錢大

忽憶南徐道春風樓上年晚鶯移浦樹苦菜秀
沙田驛路歸人少蛟門落照懸如何問津者五

載滯江船

甓湖道中雜詩

淮水無聲去東風吹甓湖市橋春店馬官驛晚
檣烏細雨連春草輕寒度白榆蕪城前路遠得
達石頭無

出南徐西門

連山一帶西南起城闕平臨十萬家細雨自生
江上草東風還發苑中花千年依舊濤聲合百
里尋常驛路斜今日壯遊成底事殘春空負短
轅車

過京口賦別曾青藜兼送令兄庭聞入

秦

菰蘆子子一閒身憔悴重過舊卜鄰同澤故交
猶萬里大堤游女又三春環江倚檻平臨楚送
客驅車西入秦幾度相逢無那老何年芳草見
歸人

京口

東風動地曉霞明花柳春濃鐵甕城萬里蟠岷
開海道二潮雷雨向神京白沙早鴈晴還集青
嶼靈鼉夜獨鳴誰領揚州持節事桓温北府已

無兵

毘陵劉大過訪草堂信宿遂別

淮陰別浦草堂邊西偃斜陽客駐船乍見忽驚
毛髮老相看獨有雪霜懸大河風起公無渡小
巷雲深我自眠慚愧舊時書舍裏秋風廿載閉
苔錢

夜同徐大青山鼓琴

湖外草堂烟霧空一聲兩聲轉未窮心知疇昔
自歷歷身與太古高濛濛落月照梁臨夜壑佩
蘭何地起秋風燈青漏轉無人見惆悵人間音

不同

草堂前舊梅一枝放花却賦

剩得南枝疎影橫草堂舊館獨淒清百年冰雪
身仍在十日春風花已生亂後故人猶見汝定
中居士未忘情紛紛桃李喧城市坐對空山共
月明

隰西草堂雜詩

淮浦西邊開草堂荻柴槿樹列爲牆意中笠澤
千頭橘夢裏成都八百桑唐室京華淹北斗楚
人歌舞思東皇優游卒歲聊稱隱處處蒹葭水

一方

深巷重門無是非閉關偃息看花飛升沉日月
此茅屋俯仰乾坤今布衣回鴈浦中雲黯淡射
魚島外雨霏微著書未了復漁獵滿地江湖人
未歸

縹緲淮東百尺樓舊時風雨一竿收奪牛亭上
人先去啼鳥聲中客自愁湖海未除看意氣穎
川如故謝交游幾回策杖斜陽裏烟水蒼蒼正
暮秋

陰風吹巷偃斜陽黃髮蕭蕭卧對牀出自北門

逢雨雪行看西日下牛羊蘭蓀香老無人谷櫻
豆花遮避世牆為問鄉農虞夏客百年身世敝
衣裳

入沛宮

泗亭春盡樹婆娑漢帝宸遊不再過魂魄有時
還至沛樓臺落日半臨河風吹大澤龍蛇近天
入平沙鴈鶩多我亦遠隨黃綺去東山重唱採
芝歌

廣陵讀史

晨昏鐘鼓向西華複道承恩出內家大業自燒

隋殿瓦宮人誰葬玉鈎斜江浮遠樹收殘照月
滿荒城起暮鴉十二樓頭千載後到今人面尚
桃花

贈胡彥遠

河渚經營把釣綸乾坤草莽一間身南陽高卧
真名士東漢餘生舊黨人十載荃蘅同入夢三
冬冰雪獨傷神荷鉏歸去田廬閉莫向人間學
問津

送客

破衲方瓢過嗣宗西風城闕送吳儂一尊酒盡

舟千里十月花開霜萬重蟋蟀堂空聞夜語芙蓉閣閉隱朝容年來久謝風塵事又向人間聽晚鐘

登歌風臺

日暮高臺風大呼沛宮子弟尚存無莫言猛士今安得已識真人先有符楊柳岸高懸野渡桃花沙暖入平蕪瀰瀰泗水還祠廟誰見塵埃舊酒徒

冬日晚登東山

木落東臯烟樹齊留侯臺上望蘇堤十年豺虎

人家少幾處牛羊村舍低落日尚懸寒郭外羣山不動大河西浮雲直下三千里星斗平臨在碧雞

登雲龍山

放鶴亭西接大河頽烟蔓草望中過頻年戰鬪逋逃盡落日山川涕淚多北枕荒城仍畜牧東臨野水見漁蓑獨聞新決澶淵道回首風塵起碧波

梁公狄過訪賦贈

萬里江湖到岸迴百年天地此中開牆東自有

君公住門外今傳陶令來斜月啼烏人罷酒早
霜驅鴈客登臺茫茫宇內誰知己慚愧同吟隴
上梅

送唐耕塢還姑孰

十年風雨鳳城隈今日臨河浪似雷獨許管寧
能割席願同杜甫一登臺梅花五月江城落瑤
草三山碧殿開君出自然逢有道曾從東漢黨
人來

贈閻古古

側聞抱膝空山裏梁甫高吟興不孤自采荃蘅

淹歲月獨留詩句滿江湖五年悲泣同嫠婦此
夕憂虞憶僕夫憐我天涯問消息鹿車一乘載
妻孥

讀曲歌

椒子熊膽羹炊豆作中醕願落歡口中粒粒知
辛苦

傳

山青主山西太原人

雜咏

委委河上梁去水一尺強梁柱割河中不愁河
泥黃事有須相成未在高其行孱鉅無擁資安

由見所長濡足無所濟屑屑勞牽裳乾坤非一
變得失不槩量洪範列周書箕子心終傷
神氣如傳舍真人無私營天德照海日人心消
甲兵舞羽有何威有苗歸虞廷劉季稱豁達終
日憎良朋
雲破茅簷出雞聲在籬梢賣柴帶醉歸一覺紅
日高焮焮竈下歇松栢香不消顧瞻烟燎上亦
有春燕巢

陰厓

自覺非道器于塵多所緣如何無人處亦復有

流連逝水靜憑氣高雲行不言懸窰訪道士坐
此每忘前

送友之秦中

爾去褒斜路秦關兵尚多難堪兒女意其奈鼓
鼙何戰地驚鴻鴈秋閨怨駱駝願聞邊火息歸
計莫蹉跎

借樓避暑

一命真如梗三年不結廬今來白水曲借得小
樓居長偃方牀席時攤短佛書高雲與疎雨鎮
日共樵漁

石壁同白居易

平橋藏却樹梢中
樹得深山窈窕紅
甌鉢春燒甜似密
葦菇秋雨脆於崧
香奩大令憐高氏
白業臺賓借秃翁
醉塞幽回貪一覺
鉗椎久寂又惺惚

梁以樟

公狄鷓民直隸清苑人
印否集

晚宿越城

停輶問土俗躑躅越王城
古月移前壘荒風啗鬼兵
燎衣殘竈火擊柝遠河聲
午夜看星氣晨雞或肯鳴

清明日雨北奠感懷

飄零華表處令節忍思家
萬井龍蛇雨三春杜宇花
禁烟猶冀北宿草已邊沙
椒醕南天土乾坤淚眼遮

徐宸旌自陽夏遠訪賦贈

崎嶇戎馬日曾記舊參軍
古磧戈鋌度高天虎兇羣
豐碑沉夏屋祭器溯河汾
欲話中原事遺黎愴更聞

送祈永還山東

獨蹇黃河路埃風賦北征
龍沙團日氣鴈陣度

兵聲海塢耕烟遠山城哨火橫知君年正少終
有棄繻情

登韜光菴

四山青欲下衆樹密難名時有竹光入遠聞泉
水聲廳拌石子落猿挂翠微行對境忘言說玄
情去復生

渡桃花澗訪恒上人

不見桃花樹惟聞澗水聲偶然尋去路一徑入
霞城雪瀑崩崖轉松濤靜壑鳴遠公過不厭閒
踏石林平

渡淮至泗上

曾溯荆塗口長淮動地來萬山龍氣合一水霸
圖開賈客爭魚麥周行鞠草萊艱難思過沛重
上大風臺

送高二亮歸平州

汝歸觀碣石雲海正蒼茫天地尚雄畧王孫幾
夕陽白頭羞苜飯黃葉夢樓桑吾道方行旅無
為岐路傷

舟汎王山寺

草際孤帆出橫江隱半峰殘霞高寺古急雨晚

山濃荒棧支鼉窟驚沙走鴈淙夜涼天梵下謾
謾響杉松

別攝山瞿大師

蕭然孤衲影高意滿松門山曙羣青合林空一
鳥喧世緣谿水澹道味芋苗存不負靈源意重
尋古德論

歲暮望大兄不至

薄海交游盡殘山老弟曩漂搖羽尾急跋涉脛
毛存落葉辭荆樹荒雲守蕨根暫歸猶勝客敢
作故鄉論

于一避亂盧家堡來晤因得聞江上信
念亂憂方大披荆爾忽來乍詢家室在初諗甲
兵回海嶠風秋勁蕪城門晝開秣陵雲氣好重
上射陵臺

白田雜詩

吳歛楚舞雜羌歌翠靨紅顏駕橐駝一曲琵琶
萬行淚朔風吹夢度交河

邗上逢舊歌者

內家檀板幾人存凝碧池頭暮雨繁莫唱開元
供奉曲臺城烟柳自黃昏

哭大兄

鳴鏑中原古戰場鐵衣夜度陣雲黃陌刀不浣
男兒血却裹荷衣葬北印

李清 心水映碧江南興化人

癸巳夢過靈巖謁繼起和尚得句

廷尉公著述甚富唯不作詩夢中謁
繼公得後二句長嗣稔增成一絕採入

十載滄桑百感興每逢耆舊倍填膺於今名利
都消盡却指蒲團問老僧

王猷定 于一軫石江西南昌人
四照堂稿

晚步劍山至朝陽菴復還若公蘭若

策杖倏東往沿江復高阜盤躡下層崖波濤喧
肘後上有雙人峰積石蒼苔厚窮崖一戶開居
然見緇叟指點渡頭山山山落吾手歸塗穿日
脚月出斷山口下看捕魚人乘潮若飛鳥咫尺
寺門深海氣到林藪默坐觀此心鐘磬亦何有

看月

日見海天低夜見海風苦海水浴天時星辰皆
作雨惟月下海中百道金光聚波響月可聽波
來月可取試問山中人月來幾寒暑

螺舟招集北園小閣漫興

同方朔圭山菊裳
天目香令同叔汝

受學
臣

遠風似潮來瀕洞到羣木小閣如乘潮開牕恣
遙矚一鳥鳴前林衆鳥相與續林外紛笑語聞
喧轉幽獨俯看池上波羣陰走大壑彷彿上鬚
眉漸見斜陽綠主人羅盤餐兀坐意已足靜密
聽無聲高堂闕修竹

姑山草堂歌

我鄉麻姑之山四百里上有百道神功之飛泉
奔流盱江岷江勢乃止十年伏劍不得遊波濤

斫斷蛟龍愁今秋徐子顧我邗水傍曰余家在
姑山之草堂噫吁哉爾乃得有姑山之草堂使
我聽之神徬徨姑山曷有白雲千畝槎牙虎石
蹲若鬪萬壑蒼鱗風雨吼日月標空石上生仙
人鐘鼓靜無聲滄海幾枯柯斧爛一局棋枰旦
復旦徐子居此幾何年況有漸山堙谷皆名田
一朝江南飛戰瓦陵陽山繫將軍馬草堂從此
絕古春荒榛豈有隴耕人夜夜老鴟山鬼叫愁
殺李白同謝眺青山李白樓到今只聞野水流
似此何能不感傷人生各各懷故鄉懷故鄉君

且歌百年徒爾喚奈何有時頭白蔣陵樹有時
聲咽玄湖潮乾坤已老君且少烟鹿可友芳蘭
可樵君曷不圖渾沌倒天瓢于以揮八極而遊
逍遙如我有山歸未得日走大江望山色古云
望遠可當歸不如君言此山猶依稀噫嘻果如
君言此山閒作主我將負君春賃君廡割君半
嶺雲當我家山譜不然送君將歸我心苦

軍山看日出

天雞叫罷海水黑萬里扶桑絕消息長鯨鼓浪
吼天門北斗薇垣辨不得有客通宵坐石林寒

風三月吹人心以袖蒙頭臨絕壁樹外倒看天
沉沉須臾東際生微白碎剪波光亂天碧丹霞
氣矗尚氤氳已有金蛇兼電掣可憐久雨廢耕
種萬戶愁雲方入夢頭白書生愁更深眼見陽
回心轉動那知聖人出深宮九霄步步光玲瓏
橫空作勢屢興沒羲和攬轡何從容劃然半壁
紅輪起砍斷蛟龍四海水三湧飛光上碧空回
看一寺桃花裏

舟泊楊子橋

韎韐風濤外閒心寄次寥馬嘶黃草岸人急暮

江潮墻影眠寒水谿聲走斷橋夢中敲古缶長
憶廣陵簫

送梁仲木之揚州余亦移家高郵

攜累同孤影寒江奈此行獨憐髀肉在相視古
刀鳴乞食窮心路驅愁借酒兵茫茫春氣內不
辨鳥禽聲

招隱寺

處士當年宅蒼然古木存雙泉明落日獨寺望
寒村炊晚僧歸院鐘鳴虎過垣行行吾自適高
隱不須論

除夕憶兒茂

失學吾誰咎長貧汝乏師江天風浩浩母櫬草
離離弟妹何時壯袁臨又合圍欲歸那可得白

髮任肩垂

時袁臨二
郡被圍

聽楊太常彈琴詩

蜀人楊懷玉
先生名正經

七十僧行脚居然老太常自稱楊業後醉卧幾
沙場百戰防山海三餐侍帝王聞聲不敢讚天
語過師襄

同杜于皇因圃抵足聞歎

一歎白人頭肝腸事事休縈愁須有地于世總

無謀夜靜星辰苦霜嚴鼓角道老夫裝被薄寒
重為君留

舟行

三月朔日

海陵城忽過四望遠濛濛布被經斜雨蒲帆飽
大風驚鷗飛不定初柳意無窮三月今朝是扁
舟東復東

贈翁山上人

盧龍飛將地下卽李陵臺落日三關望悲風萬
里來蛤螺何太苦荔子熟應回看盡長城路虛
空徧草萊

同行嘗獨坐吾又愛殘僧此去聽江雨連牀共
夕燈鐘聲來客棹花氣動春冰二月狼山望烟
波隔幾層

石城

來問草堂寺初鐘已渡橋人烟屯石港漁火上
江潮野戍重關靜王畿設險遙憑高天萬里僧
影共蕭蕭

阻雨望真州不得到

口外黃天蕩人家太子洲只飛千騎甲不渡一
人舟戰地江門苦遊魂荻岸愁斜陽兼雨看親

切此山浮

金山

孤峰百里見雙槩一舟行滿地江風動如聞廟
鼓鳴蒼雲連海暗駭石接沙平犀甲何年事春
山草又生

螺川早發

月落秋山曉城頭鼓角停長江流遠夢短棹撥
殘星露濕鷗衣白天光鴈字青蒼茫回首望海
嶽一孤亭

鄭州開元寺野望

興亡占遠氣難老古今潮城對唐朝寺人經趙
氏橋虬鐘縣老樹鴛瓦沒寒蕭日落碑沉夜春
星伴寂寥

客燕偕內僧話

且置威音事閒談天寶年乾坤吹野馬雲水黯
山鷓世換人多默語低心可憐深宮長遶夢劫
老一鐘傳

巳亥七月移家盧家堡舟中卽事

亂離曾幾日兩度出嚴城國難輕妻子時危重
甲兵鳥飛赤羽急月照白虹明茅舍三更夢茫

茫野水聲

返揚州喜晤孫無言

却訝秋還在蕭條滿目非江山千騎暗城郭一人歸見子南冠淚猶驚楚客衣庭花何爛熳寂寂伴伊威

送侯克魯之秦中二首

蒼蒼樹色滿西陲古道咸陽舊雨吹太華一筇看日月軍書十萬領熊羆壯心未老關雲亂孤劍長鳴隴水知幾處旌旗迷漢代昆明應續少陵詩

百戰關河一劍遊動人清淚極邊州圖書盜賊歸何處財賦兵車莽未休鐵嶺塵飛三輔暗瓦雲風動五陵秋君行莫唱烏烏曲咽盡銅川水不流

宿白雲菴

寒燈寂照夢難成但覺逢僧尚有情關外客船喧野岸枕邊官馬踏殘更兩淮烽火人初靜千里星霜鴈獨征為弔漢家辛苦月夜深猶傍釣臺明

客淮雪夜同四弟子展宿天興觀

時子展將歸江右

廿年布被擁荒城古寺驚心倏二更特地冷風
窺鼠竄橫天大雪下鐘聲弟兄語少衣多淚老
病愁深夜不明爾去戰場誰作伴康郎山下又
移兵

乙酉紀事

時事日非正月挈妻歸里改葬先王
父二月改葬先王母及葬先太僕公
妻從余處荒谷誅茅營窀穸畢始入
城七月兵亂余居圍城中得不死妻
腹兒奔竄落星橋土寇發難趨豐城

十月亂平復遷省城產兒孫茂

匝地烽烟接舊京北邙何處卜先塋星辰夜照
芒鞋路關市朝開鐵馬營逆將聚兵三日戰亂
山懷子一人行兒今忍問桑弧事苦月荒風聽
母聲

秦郵漫興

三十六湖鉦鼓多郵人以鉦鼓取魚湖中人唱打魚歌春
風禾黍神農郡州有佳禾一名神農郡夜月骷髏城子河異代
莊官傳野史當年丞相幟天戈青山大路今如
髮哨馬灣頭又幾過

重陽

十載重陽兩白門
同君舊話黯銷魂
卧龍岡上秋千里
戲馬臺前酒一尊
作宦幾人尋草徑
論詩深處有苔痕
橋西不減南郊興
日暮蕭蕭楊柳村

訪陳師黃絕句師黃為靖南參軍

北狩當年事忍聞
至今惆悵靖南軍
可憐血戰殘衣在
板子磯頭幾片雲

中元前一夕泊石門聞岸上作浮屠事

泫然有感

石門陌巷柳青青
舊日鐃聲此夜聽
枕上有魂招不得
秋風腸斷語兒亭

呂大器

東川四川遂寧人

潭市

曲澗涵秋雨
人家水鏡中
蜂房綠石竇
虬樹繞花叢
農事悲荒土
鄉心寄暮鴻
徘徊萬里路
何日到春風

湘潭道中

世路原多險
況經巉礧行
日從當午見
雲向漏天生
果熟猿朝暮
花深鳥送迎
何時出暗谷
一

望大江平

晚至閬州

一葉嘉陵下冰心對綠漪豈無丹闕戀終抱白雲思輕艇星前導微波天暗移南池千萬折懷古一增悲

昭化縣

不堪百戰後寥落兩三家白骨堆荒阜肯憐亂晚霞高城行鳥雀古廟困蒹葭羣盜中原徧愁心未有涯

泊略陽下灘

祇爭一帶水尚枕小溪眠漁火穿江出村烽帶月傳孤城還屹爾白叟半蕭然回憶垂陰處森森俯大川

渡臯蘭作

相隨洮水渡蘭津高柳垂條麥浪勻玉塞西馳尊八極黃河逆轉壯三秦應教滴博歸荒服更遣輪臺置守臣此日神州煩擘畫且從徼外洗烟塵

鎮羌道上有感

鷹眼何堪秋草枯姑臧清節至今無籌邊不肯

空談虎策國豈容先問狐已許此身齒塞雪那
教鄉夢到江鱸雄風歌罷秋聲壯古驛亭前倚
湛盧

早發古浪

水剩山殘接大川平沙一望不分天何從去覓
金屠澤且喜來無鐵箭傳秋草正肥驕塞馬寒
膠可折勁霜弦孤城昨夜隄防密鼓角聲高壓
遠邊

雙塔道一

七月柳青麥未黃江南花盡塞西霜一灣清玉

流殘磧萬里寒沙築大荒劍舞明星綠露淬弓
彎新月倚風強白狼西去烟初靜莫唱涼州客
思傷

黑松嶺

漠漠濃烟罩萬松逶迤秋嶺盡成龍聲寒鐵騎
千軍肅一線遙看古戍烽

徐

枋

昭法江南吳縣人

送筇在師遊越

花雨淹遊屐樵風送客舟江山猶別墅耆舊盡
荒丘一往滄洲遠千春杜宇愁此行非避地乘

興獨相求

范鳳翼

異羽太家江南通州人
超逍遙草

追憶高景逸周蓼洲顧塵客周綿真諸

君子

嗟此流俗下黃虞不可作厲志崇令儀弱植漸
虛薄眷然念亡友言笑宛如昨奸慝據台司仁
賢糜鼎鑊莊生病為犧禰衡死於鸚天運已飈
馳詎忍尋真樂仰希達人軌俯謝浮名縛無用
同散樗息影還冲漠

訪沈汀州不遇時值其有新安之行

九秋落木毘陵驛孤舟苦雨崇川客千里相思
不見君空復披帷長太息坐來孤橐吼魚腸東
南天地何淒涼欲識羈人愁絕處青熒燈火夢
休陽

宿焦山海門菴曉望

曉望出松扉支藤立釣磯江流何事急峰勢只
思飛日末孤帆杳霜前一鴈微音光紛屢幻舊
句已全非

泛漲

長河一夜綠波生縹緲仙槎逼太清乍見魚龍

趨大壑忽驚雷雨暗孤城飛流撲面如山立遠
勢浮空到海平東去蓬瀛殊咫尺冷然直欲御
風行

秋日過焦山海門菴

螺逕迂迴鶴迹深瘦筇扶手任孤尋門銜滄海
初升日峰落空庭未夕陰薜葉秋高裁野服石
牀雲暖疊重衾時聞夜讀兼清楚靜者因之長
道心

登東昌城樓

濟陰秋色滿林柯殘角離鴻愁裏過風壯海濤

連漢湧嶽高寒雪入樓多右軍宅傍桃花澗莊
叟臺鄰瓠子河轉眼千年悲往事竭來天地一
漁蓑

從祀獻陵

癸未

澹雲疎雨冷華鐘肅肅靈宮儼帝容五月臨朝
千載墓中官掩淚說仁宗

秋日渡京江

瓜渚輕舸破浪風金焦逆走亂帆中秋高不怕
波濤險欲看江南楓葉紅

顧夢游

與治江南吳江人江寧籍

夜投祖堂勗公房

向晦止行邁回策投香林登嶺絕樵訊蔽榛聞
梵音下循水岸轉遙見山門深陰陰松栢路步
步入幽森未問所息處先清塵外心躋曠臺殿
迴折隘巖壑臨徑窮及荆戶剝啄驚宿禽老僧
具客主入夜披虛襟靜論洗凡臆陡作寒水淋
悲哉山中侶一出各飛沉而我復何事十年迷
此尋空山澹無言來者成古今明發更回首白
雲生碧岑

訪鄒滿字溪上

言尋居士家薄暮清溪道荒原鳥獨飛寒木雲
相抱入室聞疎鐘開門見秋潦落葉坐來多清
風時一掃

焦山紀遊

巾車駕言邁春烟鬱秋原欲往心數止兩氣來
前村入舟漸清霽日出明山根了了見古寺臺
殿松杉門直上轉蒼翠雲際猶吐吞遂振所攜
策登頓若騰騫目領神已越況得攀與捫海色
萬里至江聲亦何喧籬花與客笑崖僧澹無言
于焉永年歲眺聽無朝昏俯視芸芸內日月空

崩奔歎息下東嶺撲面金波翻
跌石餞落景濯足臨潺湲
何能謝塵累聊可清夢魂

社集天界循公房

來已半春徂游欣衆衲俱
鳥窺遲日下花近午風蘇
世事到山盡高言對佛無
杖錢曾不繫隨意乞香廚

同震甫夜坐牛首

四山清梵合絕頂翠濤行
有客振雙策憑虛領衆聲
人烟燈半壑僧定月三更
不寐貪靈境嗟予勞此生

歲暮寄慧公

寒山無客到破寺有僧存
數折入松徑一籬開竹門
耕牛閒早土野雀噪饑村
托鉢應空返霜天煮蕨根

若木留別用前韻

此別知非遠依依惜遠行
天空來鴈冷江濶對山平
寥落三秋盡陰寒百感生
布帆無賴甚臨去意偏輕

同鄒滿字過張來初園

蒼翠滿山村雙筇午入門
野花幽味足頽屋古

風存交澹忘先達情深託酒尊相期惟痛飲世
態復何論

送一靈師之遼陽兼柬剡公

無物可爲寄持書淚滿襟一生千古恨萬里十
年心及見悲何語重逢樂豈任別來空老去法
乳負深恩

龍江關

江關一萬戶千里集帆檣地勢臨空濶天圍合
混茫樓臺連夜雨蘆荻老秋光共付閒人領勞
勞亦不妨

萬年少隰西草堂

山色過淮少漁風出浦多中林閒白板高岸隱
黃河抱膝思當世聞歌喚奈何齋心真佛子只
此未消磨

金孝章至自吳門同祖心及次濤兄弟

小集

此回花下見一拜各傷神且喜身同在還疑夢
未真卽時呼濁酒向夜集高人醉覺乾坤好深
悲莫細陳

八公洞共賦闕字

一水出深碧窅然生客閒問津黃葉路歎火白
雲山是草皆香氣無僧不古顏泉聲如惜別相
送到人間

高座寺送春

門掩飛花後春魂不可招如何方以外亦共黯
然銷老樹興亡代長干朝暮潮馳光無繫處合
付最長條

過徐昭法山居同姜如須賦

未免塵中去其如惜別真得朋能愈疾留客不
知貧天地存諸子蒹葭老此人相逢惟痛飲往

事莫沾巾

同蔡大美徐曰贊沈治先秦淮夕泛

落日澹生烟空明浸短舫人來花檻裏酒出板
橋邊楊柳風千樹笙歌月一船十年重對此回
首各淒然

乙酉除夕

青熒燈火不成歡薄醉微吟強自寬何意有家
還卒歲久知無地可垂竿壯心真共殘更盡淚
眼重將舊曆看同學少年休問訊野人今已擲
儒冠

臘八日水草菴卽事

清水塘邊血作燐正陽門外馬生塵祇應水月
無新恨且喜雲山來故人晴臘無如今日好閒
遊同是再生身自傷白髮空流浪一瓣香消淚
滿巾

辛卯元六日集黃眉房齋中時風波初
定卜寓白門坐中茂之季公同為寓
公而余與寤明澹心游踪未定慨然
有賦

去住同為飄泊人紅燈綠酒倍情親傷心已過

方思痛壯色能留未是貧雪積橋邊千樹凍夜
晴簾外一鈎新不知別後高陽客各醉東風何
處春

送祖心還嶺南

一春風雨愁中去春去還添送別愁心事兩年
同下淚鶯聲明日獨凭樓舟車已斷尋前路城
郭重歸失舊遊祇恐經臺也荒草吾廬何不且
淹留

啓美今度滿字曰補再集小樓遲震甫
不至限深字

草閣推牕面遠林不寒前約此重尋飛鴻送目
天無際遲客挑燈夜又深城樹影分知月上籬
花香寂畏霜侵怪來山似詩懷澹野霧空浮碧
岫沉

北固送春

歲歲留春春不住今年別處在天涯牕邊黃鳥
清江上樓外青山古佛家南浦蘼蕪烟若夢東
風楊柳雪為花枯僧對此還惆悵況我停觴坐
日斜

歸夕對牡丹小飲

花下人歸喧女兒老妻置酒索題詩為言昨日
才全放更比去年多幾枝燈上香光如更好夜
來風雨不堪思巾車若肯先三夕飽看還從欲
吐時

同蒲字出松塢閒步

出塢仍行數里松松間清楚滯幽踪過山又見
前朝寺昨夜共聞何處鐘樹樹抱花圍鹿苑家
家開戶對牛峰春來一望紅多少莫問桃源路
幾重

真州拜文丞相祠

楊子江頭丞相祠春帆弔古獨看碑申興百死
猶思濟正氣千年儼在斯風雨如聞九合語乾
坤又見陸沉時吞聲野老偷生久未薦蘋蘩淚
已垂

同安道中見紅葉時冬深矣有懷今度
望望蒼山登復登梅村柏塢一層層如春天氣
忘歸客忽亂鄉心到孝陵

杜祝進

退思湖廣黃岡人

題謝文侯寫姚伯符金吾沙上射鴈小
照

左手彎強弓右手拔長箭不射南山石翻墮雲
中鴈

湯燕生

巖夫江南太平人

思悲翁

十首

城烏集戍羅有雛不得顧四面石尤風突出丁
都護

此別無返期白衣送道左意氣如平時一身被
九鎖

舍人能上辯公廷開告密竄名黨籍中竟死不
得出

遺民詩一
四三
手書出園土字畫不可識持讀向秋旻二儀為
薄蝕

明明貫索城纍纍君子繫大陵已積尸天讒那
得制

阿閣復阿閣阿閣無巢禽鳳衰亡其德人死殉
其文

滿城新堞嚴故宮頽垣峻喬固此暴尸內地同
時震

昔來驄馬嘶今來青蠅弔門外湖水深不被天
回照

客行依右族右族不自保喬岳忽崩摧部婁復
何道

從死不獨妻請命亦有弟白體見先人披髮訴
上帝

赭山懷古

赤鑄山頭鳥不飛上皇曾此易青衣無多侍從
爭投甲有限生靈但掩扉五國城西邊月苦景
陽樓下夜鐘微心傷莫唱淋鈴曲未得生從蜀
道歸

淚逐天風向北揮山僧指點舊重圍素車東駐

泉偏咽代馬南來草不肥野老久知今日事先
臣猶護昔年非延秋門外王孫盡司馬元戎自
錦衣

嗚咽江流繞故關北轅不見有南還宮車夢想
來閭闔高廟歌思在里闌澗夾青絲環萬騎崖
懸烏幔侍雙鬟亦知帝座傾危久古井苔紋淚
已斑

直上孤峰似劍鉞鴻溝那復割秦疆山花終古
不成笑隴月重來黯獨傷夜宿天低金鷲寺晨
炊夢冷玉麟堂青城山下無多地白草黃泥御

道荒

費經虞

仲若四川新繁人
著雅倫

上梅花嶺

傳說隋朝苑蒼茫烟樹空殘陽遙野寺古驛向
江東一代高原後孤墳亂草中逢人求故事何
客號于嵩

揚州北郭為
史相公墓

遣兒密往褒城張氏授徒

送汝出門去高堂淚黯然病來今更瘦亂後久
無錢斑白來千里全家食一編艱難宜力學大
父是先賢

喜張象翀至揚州話舊

吾子何時至鄉音入耳新久爲吳地客終是蜀
山人沽酒坐中夜看花到暮春百年才論定只
恐媿芳鄰

思蜀

垂老無家只自憐不堪往事益淒然當門慈竹
八千里昨日疎梅二十年旣使丁男安稼穡遂
無姓氏到風烟春時更覺傷人意寒食青青麥
滿田

自漢中攜家往江南

蕭條故國賦東征白首攜家萬里行珠樹有禽
隨我隱玉山無地傍誰耕餘生已覺羞鑿柄舊
曲誰堪更羽聲夜起呼兒同玩月老夫不是爲
多情

雪

高城臨水浩無涯雪片飛來奪月華天上遂教
殘玉樹人間重與種瓊花丁年絕域迷歸路寒
夜孤舟未抵家吳越乍聞歌楚調空流老淚向
琵琶

江南過人家舊園

寒泉老樹好人家
漠漠荒垣帶淺沙
斷壁尚存當日賦
滿園不是去年花
傷心短蘧聲何側
目飛鳶影盡斜
使我重來見荆杞
那堪良夜聽悲笳

揚州春日

緩步西郊日欲曛
水流花發又春分
久無弟子傳秋駕
空有佳人隔暮雲
沒盡雙鴻聲尚在
飛來小鳥食爲羣
興酣思續蕪城賦
老大悲傷不好文

定軍山下村居

倦起披衣獨上臺
白雲紅樹一重開
石泉香透花長落
木葉聲乾雨乍來
觀物未能忘舊事
避人稍欲著新裁
耆年何處歌商調
扶病相從聽七哀

亂後還家成都殘
民無粒食三年取
草根爲食

亂林深處絕鴉棲
虎豹聲高夏日低
留得殘生無食物
青山白日鑿黃泥

乞休 癸未年作

八次乞休歸不得
衰容病骨禮瞿曇
黃冠返故

今無望添箇人間小雪菴

子以削髮
乃得辭官

采冬青子煮藥酒

老病全宜補濁醪藥方新得采林臯冬青樹上
鴉來宿此樹悠悠見汝巢

歸田吟

家破猶餘半畝塘杜鵑啼處柳絲長騎牛不到
人間去白髮蕭蕭曬夕陽
出山未達便無家結屋青城上紫霞手版何曾
成一事幾年辜負碧桃花

余

杏

生生鈍菴四川青神人
增益軒草

廣陵季春十有三日憶沈子禹甸生日

對酒懷之

虎丘何鬱葱雲霞望如綺中有抱道人時在雲
霞裏三春景物繁花氣香流水詩歌陶逸與琴
尊延近理別來歲未周緘情缺雙鯉遙憶子初
度馳懷更依依為子歌斗酒獨坐開雙扉微風
起將夕園景澄清輝醉卧不知曙迢迢星漢微

簡友

歲暮增無那而又窘陰雨隙風入我懷氣咽不
能語探囊無長物枵腹待懸釜衰殘畏奔走晏

眠恒至午人情近反側誰能更古處知已言在
耳德音燦可數倘終顧盼情旦夕臨江許

春仲客廬陵同友遊神岡山翠峰寺

雨足天景佳相攜尋野寺曲徑綠陂塘菁葱連
雨氣深林隱茅茨蒼茫生遠勢曠覽天地豁靜
對人世異荒涼古時廟殘碑紀行事

宋紹興間太
后六宮泊舟

于此神顯靈異護衛後
得勅封今碑乃宋刻

俯仰傷心神寧為榱桷替循

崖入翠峰頽垣攢薜荔松古不知年離竒難位
置賴此山水情斗酒放情致日夕歸遲遲明霞
麗幽翠

戊申秋日陳子招遊翠屏山遇三山友人

出郭企高吟信步展遐眺曲磴延荒榛修崖俯
逵道秋林漸荒落雲日相暉耀翠屏列崇巔嶽
崎乃天造江光動危瀾奔流逐輕櫂羣山相環
屬峰峰見竒峭古刹雖僅存形勢得其要非子
盛招攜曷盡所歷妙樽酒遇同人經言佐談笑
懷賢心彌留西崦薄沉照振衣下重巖對景共
吟嘯欣賞未云窮重來肆憑弔

壬子春仲同家不遠遊焦山

猛風蓬勃來千里凌晨吹立長江水我曹乘興

約同遊衝風側立待舟子招招舟子駕一葉牽
衣欲渡意還怯乘危恐觸河伯宮波袞濤湧驚
魚龍片帆飛渡任欹側頃之足與山厓接向時
驚悸今得寧扶筇拾級相兢行天光冥冥海氣
白羣山細縕成一色憑高下視鷹背飛轉眼忽
見松濤碧砥柱中流既有年孤高直與溟渤連
上有金山中北固三山鼎峙如手足古來大隱
傳焦公今時高邁孰與同我來瞻眺起遐思風
濤萬頃雲霞東

新灘觀捕魚歌

君不見新灘竒險天下聞驚濤怒浪如山立上
下舟行實畏途放舟須仗土人力上灘牽挽終
日勞逆流直上百餘尺束舟委浪下更難撇漩
擎波如箭疾灘際回流急且深承流鼓浪魚競
集漁人舉罩百不失烝然罩之如俯拾傷鱗破
額委泥沙慘澹腥風陷朝日跳波脫漏時有之
潛迹江潭秘呼吸土人竹篾滿背歸戶戶門前
盈百十霜刀直下亂雪飛棄置頭顱人不食乾
魚家家挂滿壁腥臭漫漫氣難息誰云烹鮮世
所珍見之悲惻情罔極嗚呼廿年殺戮人民空

今復毒流鱗介中

蜀都行

自我之成都十日九日雨浣花草堂益蕭瑟青
羊石犀但環堵生民百萬同時盡眼前耆舊存
無幾訪問難禁泣淚流故宮荒廢連禾黍萬里
橋邊陽氣微錦官城中野雉飛經商半是秦人
集四郊廓落農人稀整頓凋殘豈無術流亡安
集誠可期但得夫耕婦鑿無所擾桑麻樹畜隨
所宜數十年後看生聚庶幾天命有轉移

中秋後一日曾青藜寓齋讌集同人分

得憑字

昨宵對月今宵雨兩日陰晴不可憑客裏招邀
常賴友山中棲止但依僧才高何必愁貧賤時
至無煩感廢興幾度浪浪檐際水隨風飄灑濕
孤燈

王光承

玠右江南華亭人

登北固山

吳山從此盡楚水到今長日月懸高樹星河帶
遠荒樓船時聚散戰馬亦玄黃欲問孫劉事平
沙幾夕陽

襄陽蹋銅鞮

襄陽白銅鞮玉勒黃金羈馬前何纍纍揚州游冶兒

官從襄陽來最愛襄陽馬金刀美少年承恩雙關下

黃宗羲

太冲梨洲浙江餘姚人

卓烈婦

并序

烈婦為廣陵諸生錢公穎女年十七歸前指揮卓煥煥字文伯其先忠貞公死遜國難族誅公之子有逸去者

至宣德朝事覺其時禁網稍寬得戍廣寧衛是為煥二世祖至三世祖以軍功累官指揮使煥襲祖職逮廣寧陷徙居揚州隨督輔史公可法守城乙酉夏四月揚州郡城將陷前一日烈婦曰城陷必屠婦女不能免辱孰若先死煥止之謀匿複壁烈婦不可抱三歲兒奔後園家人追之烈婦急抱兒躍入池死時煥之姑適王氏者少寡歸寧于家亦躍入煥未字之妹

二幼弟三亦皆躍入嗚呼烈婦一言
未亡之人未嫁之女孩提之童一時
感憤激烈相率從死真可慨也吾友
蕭山王自牧作傳甚詳其事余為賦
詩四章

兵戈南下日為昏匪石寒松聚一門痛殺懷中
三歲子也隨阿母作忠魂

無數衣冠拜馬前獨傳閨閣動人憐汨羅江上
千年淚灑作清池一勺泉

問我諸姑淚亂流風塵不染免貽羞一行玉佩

歸天上轉眼降旛出石頭

王子才華似長卿斷腸數語寫如生至今杜宇
聲聲血還向池頭叫月明

賈開宗

靜子河南商丘人
選詩正

卓烈婦

前指揮卓煥妻錢宜人乙酉四月揚
州郡城陷先一日投水死

睢陽鬚眉今已矣南雷鐵骨不可起天地正氣
付阿誰茲道如今寄簪珥黑雲黃塵動地來千
家野哭城欲圯夫妻相向暮烟頽一笑凝睇豈

惜死夜靜不聞兒女啼芳蘭萎謝金閨裏君不見蔡琰昔日胡笳行馬上嬌癡泣隴水含嗔欲死死未能何如玉碎榮蒿里不信試看廣陵三月濤至今風雨猶蕭蕭

過淮浦

已棄君平世猶來問舊間依然流水岸尚有故人居事業雙杯酒行藏數卷書并州已十載客興復何如

李孔昭

薊人隱盤山

春去

門外江水流春去門裏柳枝飛白絮紛紛燕子不知愁還向人前語不住

董

樵

字樵山東萊陽人

岳墓

到此生遺恨有詩未敢吟語及高宗事恐違地下心

岑

徵

金紀廣東南海人

贈孔樵嵐送友之關外戍所

遊子色慘淡疋馬聲蕭蕭征衣拜堂上阿母殊陶陶兒去兒能還沙漠安辭勞良友承嚴譴六

月遠度遼良友亦有母母子雙魂銷送之以萬里佩之以瓊瑤富貴與患難珍重兩不撓我歎有母賢乃知有子豪萬里走遠道誰識金石交

徐介 孝先浙江錢塘人

山中漫興

尋山不期深入山不期返願作山中人白雲時近遠



遺民詩卷第二

寶香山人 卓爾堪 子任選輯

杜

濬

于皇茶村湖廣黃岡人
變雅堂詩集

寓園卽事

暫歸不得息復來叩園荆婦榻恣偃仰深綠怡我情假寐遂成夢夢醒聞流鶯爲時已中伏宛作春曉聲奈何雀與烏努力方爭鳴衆雀旣嘈雜羣烏尤豪橫坐令好音阻側耳不分明三歎推枕起仰視天宇行我往屬除草我旋草未除葵荒亦在眼冥蒙相

翳如非時見醜態遑問種類殊連日資霖潦草
長數尺餘中藏蛇與虺豈但蠅蚋陸牽扳蘿葛
上勢欲薶芙蕖投足略無逕出入鈎衣裾我心
有所觀此草適可除但用一夫力坦然心神舒
累石爲池沼坼裂不見水人言此龍脊枯涸良
有以我言谷爲陵水自漲都鄙何知雨卒暴淤
水忽一指昏濁豈足觀徒惹鳴蛙起什伯相唱
和曉夕無停晷其聲頗厭聞彼自以爲美形容
昔所知氣力今誰比愁人甘一睡聒噪過無理
官私何所爲此言殊甚旨使我神不凝夢中亦

掩耳翻思雀與烏鳴尚有時已眼見水速消爾
蛙母太喜

贈孫無言因送之吳門四首

余與孫子交及今將一紀言念招提游識余及
王子子王子今則亡顏波復誰砥有失誰箴規
有善誰歡喜意忌生戈矛面諛非知己況與論
斯文迢迢隔萬里所以西州慟對君不能已

吾子與衆異奔競爲篇章不埽丞相門惟登處

士堂久要不必言焦獲孫豹人與黃岡新知日輻

輳高士不得藏我無升斗量千頃資汪洋并介

互相勉短中各有長古人重一言豈必縑盈箱
願子少褊隘正復得中行悠悠千載下長懷虞
仲翔

黃山歸未得且復之吳門吳門有何士伊予老

友存金子孝章別來又六載頭白可不論君行必把

臂鄭重相思言復有徐昭法秉心識本原筆力

亦矯矯學古窺詞源其人不可見絕俗逃山樊

嘗恐世人知所居非一村以子勤訪索當不憂

踰垣好士而得士歸來閒心魂

落盡廣陵花君始出門去曠然見大江可以洗

塵慮春浪擁金焦寄懷生艷潏痛飲梁谿酒望
見虎丘樹愛爾無機心行行必有遇交道非一
端慎勿執辭賦

送王阮亭儀部

淮水揚洪波中有沙棠舟借問將焉之北行到
幽州秋風何習習秋雨何淅淅睽彼舟中人於
我交綢繆方當來作理余適過邗溝官廉忍分
俸自笑余何求干請誠則拙談菘固其優感君
適野性飲啄勤相周送酒必醇醪推食必精饍
勝境必我招佳句必我投燠時貽我葛寒時貽

我裘記逢人日雪造我吟窮愁豈獨棄案牘居
然忘貴游人生意氣合豈在千金酬揮手送君
去此義今悠悠

田家雜興

勅勅復力力驅牛向東田積雨不傷苗回幹由
皇天舉酒酬先嗇再拜祈豐年
始壯棄書劍垂老成農家二麥既有秋瓜菰亦
作花兒孫不識字但識桑與麻
大雨水至斨插秧五月中稻苗若剪齊軟碧依
柔風老夫愛看此策杖媵西東

謝公墩懷古

舊識謝公墩今朝一登陟只此數仞丘使我三
太息人言淝水捷天幸非人力我獨謂不然制
勝在料敵苻堅喪王猛如鳥去爪翼猛死堅已
亡僅存一虛國料敵料一人百萬何足億無猛
而有垂耽耽方蠱惑乘機以斃讐狡童本英特
兵家用衆難前有劉玄德堅自來送死而公早
洞識心知小兒輩已足辨此賊所以一盤棋始
終無懼色是固坐照優豈繫浪戰塞惟彼蒼蒼
者至險不可測變易在呼吸成敗繇頃刻此舉

竟無他謂之天亦得

遊夾山漾 分韻

出塢謝羣賢放舸理長嘯烟岫映澄波始知所
歷妙林壑羅秋姿紫翠宵寒照蘋汀欲爲雪楓
岸忽如燒目逐絕境往意愜佳處要層峰何嬋
娟灣環亦窈窕泛漾疑江湖回颿復蘿鳶面面
見道場名山一一起憑弔尋幽不覺遲歸晚顧而
笑石門免見訶登樓感同調

九日一草亭時將與天章別感賦十六

韻共用日字

秋深雨廉織意外晴此日薄雲雖未歸解散已
可必危坐傷我懷雅意不欲出歛聞良友招不
待盥漱畢登高一草亭豈在山岑律幽人先入
座鳴琴未離邾盤榻但隨時盃香帶橙橘暫覺
百慮蠲遊從任疎密叢菊花故遲黃蕊苞漸茁
籬蔓弱迎霜宛結小紅實獨感薜荔枝來時伴
繭栗于今已扶疎殘陰映緗帙白頭久飄零俗
態如蟣蝨遙遙三令節過眼一何疾念此動衷
腸匪第憶家室悵別方自茲歌笑忽如失

和韻十首 選八

周元亮司農南還以孝升司馬送詩
五言近體十章見示和者如林矣僕
僅依韻變為古體非敢立異聊以免

同耳

苦次不飲酒因不歌烏烏拭淚聞君歸直道幸
不孤縱鳥得樹林舍魚遊江湖側耳做昔聽誰
喚蘆中蘆

飛雲向南犇君亦隨之還行路為君歌君胡有
苦顏不寐在明發哀情劇鄉關寧知兩老人幽
笑青冥山

有家不得思忽然為歸人園草雖未綠出郊已
知春手磨青銅鏡子細照此身周視天壤間何
者謂之貧

赦者偏枯物適復會其時覆盆實先照豈緣蚩
尤旗赫赫中山勲謫書乃自為功成不受爵惟
有彼蒼知

封侯印何似銀鐙今始開淚盡不為身更著麻
衣回死生信同城天地有異才屈竹一朝伸高
于青陵臺

兀兀岸上舟悠悠水中園鬱鬱庭前樹馬啣無

一存昔聞驚君心今見子不論高天與大地何
日不飛翻

相逢不袞袞相隔長懸懸雨雪弔羈孤風波慶
歸船粥則于斯粥饘則于斯饘門外桃花開不
知是何年

薄夫薄如紙顧謂人無情請看八閩士
洪生衆口成臯繇安得不稱平舉幡雖往事足
令譖者驚

咏史得謝翱

文山殉宋社得士亦不苟炎午祭生前臯羽哭

死後不知西臺上淚血今乾否少陵賦八哀此
意若先有所以晞髮翁遺編燦星斗

贈別葉桐初

有序

語云以富貴有人易以貧賤有人難
諒哉是言矣僕飄蓬泛梗兀然窮士
落落之踪去則忘之耳而桐初不我
遐棄自婁來郡追送依依相與攻苦
食澹析義賞文者又復彌月此殆天
下賢者非第才美過人也僕用是感
其意許聯奕世之好而詩以贈其別

桐初至婁并以示同社諸子美斯舉者相與咏之

舉世趨炎炎誰肯就冰雪感子百里來使我屐齒折我無榮與利流落頭半白舊遊凋謝盡新知欵曲絕向來天下士對面人代隔子年方終賈子識何勇決弱歲尋嵇公遠繼趙生轍淹留愧窮旅青蔬頓頓設詞賦誤時髦與子論經術自古垂大名其人多靜拙簡交息馳騫闕書始明哲風雨暗乾坤雞鳴固不輟骨肉分遂深舅甥好斯結今辰復何辰吾子起言別愁日亦何

皴回首已破月鬱鬱樓前樹見落來時葉遊處自婁東計日將二百處處共烽烟辛苦焉可說子歸了租稅禾中又騷屑孀慈正倚閭定省邨久缺側耳兵過稀吾亟返南國前期倘未遙出處為子策

捷兒從江陰歸金陵

今秋喪汝兄悲緒非一端出淚防眼枯忍淚傷心肝八月望汝來直至十月殘來時已絕望徒然劇辛酸繞鄰一月餘共苦非承歡旱冬水道絕意外謀歸鞍誰無歲暮心汝父歸獨難節序

久不知世事吾何歎老骨挫霜雪復念稚子寒
孤孫尚乳臭哀慕豈足歡天涯十八口寄書誠
加餐宛轉過梁谿從此路漫漫旅卦慎童僕今
又危弗安奔迫為先人遑恤衣裳單汝歸念汝
父何以對椒盤

三君詠

嵇康

嵇康人中龍義不可當世視彼盜國臣伎倆如
兒戲吐辭薄湯武千載有生氣臨命索琴彈聊
示不屑意

阮籍

阮籍稟天秀不以物撓真始知禮法外自有純
孝人誤受巨猾知苟以全其身不能救嵇康千
載長酸辛

劉伶

伯倫無住著乃往僑於酒卧看蚩蚩民日踏橫
流走荷鍤非為身誓以死相守至哉無能名遙
遙接莊叟

賦得烏啼白門柳

白門昔日全盛時千門萬戶楊柳枝楊柳多時

覺烏少紅樓熟睡忘春曉斬伐於今稀復稀自
從去年無絮飛惟見饑烏逐人肉烏多一半城
頭宿儂家垂柳餘一株啞啞嘗聚千百烏儂愁
儂倦耽春睡其奈羣烏繞樹呼

初聞燈船鼓吹歌

丁亥四月十七日秦淮舟中作

一聲着人如夢中雙槳再下耳乍聾三下四下
管絃沸燈船鼓聲天上至居然列坐倚船舷驚
指遙看相詫異鼓聲漸逼船漸近亦解迴環左
右戲急攢冷點槌猶澁春雷坎坎初驚蟄吹彈
節鼓鼓倔強中有閒身闌不入吁嗟此時聽鼓

止聽鳴誰能打搯聲裏情誰能眼底求精妙乍
許胸中見太平太平久遠知者稀萬曆年間聞
而知九州富庶無旌麾揚州之域尤稀竒誰致
此者帝軒羲下有江陵張太史江陵初年執國
政樂事無多廟謨競爾時秦淮一條水伐鼓吹
笙猶未盛江陵此日富強成聖人宮中奏雲門
後來宰相皆福人普天物力東南傾豪奢橫溢
散向水此水不須重過秦王家謝家侈紈綺湖
海游人鬪詞賦廣陵女兒絕可憐新安金帛誰
知數舊都冠蓋例無事朝與花朝暮酒暮水嬉

不待二月半袷服新糝桃葉渡高樓夾水對排
牕捲起珠簾人面素騰騰便有鼓音來燈船到
處游船開燭龍但恨天難夜赤鳳從教晝不回
皇天此時亦可哀龜年協律生竒材善和坊接
平康街弄兒狹客多渠魁船中百甕梁溪酒膽
大心雄選鋒手蘇州簫管虎丘腔太倉絃索崑
山口鎮江染紅製瓔珞廿碗珠燈懸一角當前
置鼓大如筐黃金釘鉸來淮陽此聲一驪衆聲
集不獨火中間霹靂風雨叢中百鳥鳴旌旗隊
裏將軍立熬波煮火火更燃積響沈舟舟未濕

可憐如此已快意未到端陽百分一記我來游
丑與辰其時海內久風塵石榴花發照溪津友
生置酒我作賓下船少遲渡口塞踏人肩背人
怒嗔燈光鼓吹河沙徧街尾蟠旋成一串蔽虧
果覺星河覆演弄早使魚龍覲衆人洶洶我靜
賞初奏此時差可辯須臾光響相糾結惟聞森
森沉沉直上翻雲漢東船西舫更交加下視何
繇覩寸瀾偶然閃倏透水處如金在鎔風掣電
樓樓堂客白下稱內人為堂客船船妓近不聞聲遠察面鳴
呼此時燈船更難動但坐飽食揮搥調絲按孔

相凌亂侯家別攜清商部邨得于中聞唱歎復
有劣鼓與劣吹就中藏拙誰能見爆竹聲低煙
霧濃暫借香風解霑汗露零雨下不得退樂極
生悲真可厭酒醒忽迷此何地魂銷略記伊堪
戀直至明朝亭午船鬆卻退人相羨歸來沈眠
須竟日流鶯啼破河陽戰此後游人數日稀清
淮十里流花片記得座中客能說王穉登穉登
搗鼓湘蘭舞賞音擊節屠長卿後來好事潘景
升晚節猶數茅止生絕藝于今誰作主李李大
歌張卯鼓當時惆悵說于今忍見于今又說古

年復年來事可歎燈船伐鼓鼓不歡辛壬之際
大饑疫惟見鳳陵烽火照見秦淮白骨橫青灘
桃葉何須怨寂寞天子孤立在長安吾聞是時
宰相薛復周黃金至厚封疆仇公卿濟濟咸一
德坐令戰鼓逼龍樓甲申三月鼓遂破斷管殘
絲復誰和半閒堂裏起笙歌平章舟上稱朝賀
試問當時雷海清堦下池頭還幾箇新劇惟傳
燕子箋殺人有暇上游船行人何必近前聽塗
毒鼓中無性命同時阿誰伎畜爾惟有黃劉高
左五侯耳君不見師延靡靡濮上水未若玉樹

後庭美賞音何人丞相齷相對掀髯復切齒一撥絃中半壁亡一棒鼓中萬人死鼓急絃驚曲不長兩年歇絕隨漁陽有客徒憐橋下水無人不斷渡邊腸及此相看真分外何許藏舟一舟在拂塵捍撥初光輝奮槌揚袖襜褕衣不燈漫乘夕照出無伴知從何處歸爭新誇異各有故君看西風桃李枝西風一枝衆稱異東風萬樹空爾爲入耳悲歡難具說醉裏分明寸心熱嗚呼漢代金仙唐舞馬此事千年有無者興亡不入心手閒然後聲音如雨下探湯搗鼓疾熱刺

應有心肝礙胸次餘音漠漠攪飛絮燈船燈船過橋去過橋去傷鼓聲長歌短歌當成隴西李賀抽身死舉盃相屬樊川生此生流落江南久曾聽當時煞尾聲又聽今朝第一聲

關山月

上有關山月下隴頭水月照行人不記年流水無情流不已月淒清水嗚咽非秦非漢腸斷絕

一杯歎

老夫愛酒兼愛杯生平羅致逾百枚于闐之玉

不可得駭雞之屏何從來哥審定審談不易醉
紅雞缸走權貴匠手爭誇天寶齋不貪豈識金
銀氣我所好者祇是宣德成化嘉靖萬曆審溫
潤銷魂可人意啓禎年間眼稍恕不論歲月論
款致說在壬戌之小春延陵詞杰作主人一杯
宛轉絕可喜酌酒半兩剛停勻其下覆手素無
文回青花葉中繽紛小兒之拳孰大小只如季
雅還三分老夫量在下中耳飲此十杯竟醉矣
因向主人乞此杯欣然首肯情何美受杯輕籠
窄袖裏准擬明朝獨酌有妙理誰防此意天已

知旋將一石橫路岐醉歸昏黑誤踏石一跌非
同少壯時觀者驚嗟老夫坐老夫未損杯已破
歸來恨恨意不平邊雪亭中枕書卧旁人來勸
老夫着跌非等閒但不傷殘即可賀何故翻為
小物愁達者如斯無乃過我言君不知我心我
豈不見俗兒酒器直萬金列櫥編識分古今我
嘗鄙之不若禽我所悲今英雄不得志虎嘯鷹
揚流水逝一卮弄酒何負天亦復抗之教破碎
坐使吟詩作賦興索然眼見斯文從此廢吁嗟
乎嘗聞嵇叔夜徐景山酒杯酒鎗亦已傳誰之

不如矧二子一杯到手便不堅又聞舒州杓力士
錙李白與之同死生白也愛杯至於此豈獨
老子獨無情

衡水梨歌

東謝
趙子

異哉此梨佳莫比不產交河產衡水淺摺先驚
雪水流深嘗詎數蜂脾美吾聞哀梨畏烝食用
違其材物之賊一片冰心托玉壺正索解人不
可得

歸不得行

杜陵老翁歸不得黃河之水聞歎息赫蹏乞米

常厚顏艱難轉不憂無食獨傷百日棲荒寺涼
燠循環豈終極初來北郭喚催耕臨去西堂鳴
促織中間毒熱不可當五月披裘心自惻典盡
寒衣縫葛裳漫向人前炫要褌青氈鐵研今何
在買薪賣到書與墨老僧日日問我行使我低
頭惟默塞積逋凌雜難具陳豈第少渠僑賃直
況復無端忤俗兒窮途苦澀添荆棘不知忍耻
復誰待平生故人萬夫特嘗將松栢比君心常
將山岳方君德癰疥為災祗妬予咫尺不得見
顏色昨日緘書汗流頰今日題詩淚霑臆老翁

他事休再論歸飛願借扶搖力

唐港耕人歌

黃河北岸飛黃沙倪生有田河水涯地名唐港
濱瘠鹵耕種不熟催科譁大兵四征復加派公
庭使費紛如麻借問此田胡久留誰愛苦李求
匏瓜倪生昔日有此田無米納課猶安然三二
年來家屢空安得飽飯還晏眠佃人走散老特
死田生白草如窮邊倪生一朝長歎息驅我力
作寧非天東鄰借錢鎛西鄰借桔槔南村買黃
犢北村賣寶刀嗟爾倪生本詩豪惟知痛飲讀

離騷如何襖襪跣雙足犁鉏之具手自操倪生
答言良有以童僕忠良古無幾汗萊重使遭浸
漁不如棄向黃河水唐港耕人名亦佳旣耕還
讀原由已但求了得官家糧歲時父子皆歡喜
君不見陶潛田舍有真趣飲酒篇篇見佳句尚
嫌嬾惰不躬耕柔腸寫在闕情賦諸葛躬耕頗
不凡多事他年答三顧畢生漢賊終兩立豈若
南陽守康瓠吁嗟乎倪生之先人功高未得圖
麒麟有子儒雅復苦貧始知韜鈴詞賦兩俱錯
對君且說田家樂

悲哉行贈余子生生

悲哉余生去蜀萬里無以爲家而投老乎東海
之濱悲哉余生不悲其身之無家而悲其先世
之無墳蓋嘗泣血負土辛苦萬狀而後得以掩
夫纍纍之骸暴露而縱橫悲哉余生蜀中多虎
虎之力足以守墓奈何虎去而來此不義之人
彼楊璉真伽輩方塞乎天地乘車戴笠者皆是
曾六陵之不恤而奚有夫金吾之家世司馬之
功名悲哉余生遭世之亂不在于刀兵水火而
在于斯人之喜怒哀樂皆失其正而倒用其情

其得之則喜失之則悲者惟勢與利而漠然于
吾君親悲哉余生所以悲不可已而彼蚩蚩者
顧反悲生之窮老而無家也豈不重爲生所悲
哉悲哉余生

同心念一老歌

老夫怕熱抱佛脚龍興古殿命所托清晨躡入
復對誰彌盧尊者眉如昨金像還疑汗在顏那
有醍醐分半勺沉眠只願夢化魚却思魚亦匪
克樂元都道士偶相識見我眼赤貽我藥藥封
不動休致疑生怯鐺火添燠灼紫薇泉水清見

底汪友西瓜難再索自憐內熱不可瘳安得層
氷供大嚼忽聞童子叩殿門恐是熱客驚我魂
入門乃是黃魯直遣童挈榼提清尊開樽頗怪
無酒氣小榼未啓香氣氤氳榼中宛轉亳州之蘋
果尊中湛湛泉出江左惠山源把瓢飲水毛欲
立蘋果漫喫核僅存豈獨二物性所愛日來暑
病都除根問之何由得有此童子喘定始細論
嗟乎世人贈送踴躍走豪富三韓氣息尤所奔
獨君父子同心念一老使我震動感激聲還吞
後快哉行

今年竹醉之日得好雨原田水深非小補潺潺
號號流洽旬情農遲種仍乾土嗚呼皇天亦難
作倏堯倏湯爲怨府北風之圖不我涼雲漢之
詩亦何苦或言龍挂三日前火雲騎日殊茫然
或言屬邑有大雨來者亦復云虛傳或言四鄉
雨不絕太守疑信終憂煎寸忱積禱見靈貺祝
版往祭豐山巔歸來割胙貽客子仲叔豬肝何
足比誰知飲福猶未終電掣雷轟二百里分明
舊雨不如今舊雨三尺今半咫舊雨當時已足
竒今雨回天良有以君不見大河南來十三盜

礮礮項領猙猙貌八盜八馬皆肥膘一朝穿鼻
擒之到刀脊猶殷又澗血箭鋒忽折仙居道觀
者傾城如堵牆駢肩疊跡惟知笑維時太守獨
沈思城中巢穴誰得知矧有兩梟猶未得寧無
三窟當窮治大之城池小府庫豈獨編戶關安
危弘羊不烹天不雨何況此物容留遺果然一
鞠得賊首市中童謠天上口娶婦如花親串羞
成家伏莽交游醜明臺懸鏡光熊熊賊智焉能
度某某向者克徒皆虎豹此時囚繫同猪狗快
哉真賊盡得株累寬廓清不獨滁陽安是日密

雲方布護列缺吐火豐隆謹金蛇出沒銀箭攢
絕竒兩點大如盤東塘放溜西堰滿古井亦復
生波瀾當知從此直至秋成不復憂雨少除民
之害天心歡噫嘻彼焚巫覡誠何干

觀棋行

倪生周生居比屋秋涼賭酒憑棋局布子寢多
勝負分倪生黑子彌方幅周生暗數色沮喪細
語微聞五十六安排今夕周作東溪蟹香醪入
吾腹俄頃局中忽大噪喜者却驚愁者笑地覆
天翻一看差可憐官着還難料老夫覩此惆悵

不能餐棋乎棋乎何足歎

柳冠道人歌

為張子
虞山作

道人前年行萬里探竒去飲珠江水歸來一物
無所攜獨得柳冠大如指柳冠華首日相親人
見柳冠識道人翻恨此冠人易識不教簪導人
風塵道人吟詩追古調方戴此冠搜衆妙道人
彈琴求正聲方戴此冠遊太清道人飲酒復擊
劍此冠岳岳增光燄我愛道人真忘機海鷗石
虎無是非我愛道人真急友長向龍興寺中走
八公山南多第宅道人不作淮南客淮陰市上

多少年道人不賦絕交篇借問道人何砥礪所
期不負柳冠意莫言草木無心肝會見丹青閱
人世嗟予嘗少冠竹皮近來老秃無一絲柳冠
何似無冠醜惟有頭上青天知

揚州雪

庚戌十二月客揚州作

揚州雪積如山滿城乞兒盡凍死商人亦覺今
年寒客子衣單資用竭似到揚州來看雪雪下
白簔簔入釜不可炊江南亦有雪江北來何為

揚州春

揚州春迎春自東郭盡道今年官作春先期三

日行催索積雪泥深一尺餘倡婦挾瑟乘肩輿
紅粧半露疎簾裏不知顏色還何如春日諸官
宴綵幄此曹勸酒須唱曲請君但聽曲莫聽六
街三市哭

揚州客

揚州客出門殊意氣匣有無弦琴知音期不至
嗟爾客來去無計故人賴有韓張良釋恭也層冰
窟裏露熱腸鯉魚尺半亦尋常魚中素書不可
忘

樵青歌

為黃仙裳作

當時同學十數人兩人引頸先朝露一人萬里
足重繭一人入海隨烟霧三人滅迹逃空門四
人牆東長閉戶一人賣藥不二價一人佯狂以
自污黃生計畫無復之門前便是青山路昆吾
寶劍千金直改鑄腰鎌應有數黃生終日無蹤
迹上山清晨下山暮有時昏黑猶在山痛哭身
當猛虎步不知為樵定何意黃生安肯言其故
但聞有一海陵樵時時偷訪鍾山樹

八月八日同天章任公飲虞山張子齋
中歸經一丈亭夜談紀興

步出蓬蒿徑還過一草亭
何扉知不遠客屐恰
須停夜雨傳杯靜秋燈說鬼
月征鴻太嘹唳幸
得醉中聽

登多景樓

乘興不能遠來登多景樓
夕陽江色異甘露寺
門秋草木添新恨漁樵減舊游
步歸防小梗躍
馬徧林丘

花時貫緼袍

敝緼空將去何曾及米薪長饑從
入口難負是三春共笑無衣叟
方誇獨樂身號寒終有日不

悔見癡真

江南傷水潦城北自花開憂世非
吾事為歡在不才袍如春鴈去
酒似晚潮來正使平成奏于
人何與哉

泊秦郵贈劉雪舫

宿槩傍秦郵城中訪故侯攢眉
經馬隊容膝到瓜疇世界湖天
迴門庭竹栢幽寧論今昔異只
作本林丘

送別龔孝升

天末衰遲眼十年望故人相逢不
長聚後會復

何辰獨困方知拙難言始是貧良時多好語忍
淚盼行塵

揚州教場寓樓坐月

鼓角竟無聲愁人愛晚晴寺樓雙眼潤烟海一
燈行玉笛悽應斷銀蟾缺更明坐深無歎息真
想靜中生

樓夕

為客曾無故登樓亦偶然古城延落景秋草上
青天野火風吹盡平沙月照圓馬嘶今夜苦歸
夢戰場邊

題蒲道人亭子壁

倦客時吟望老僧虛此亭雪消江始白春至草
初青一室能周覽雙扉自可扃錫山歸棹便應
向此中停

金山

山從南北望孤棹始登臨坐覺春雲動行看水
國深江流元自湧天地亦何心獨拜蘄王廟英
風爽客襟

妙高臺無月

正月十七日逢初
度同軫石前民作

連宵皆好月此日特登臺何意東峰雨疑從北

固來江聲催白髮天影落空杯一霽偏相吝蛟
龍永夜哀

金山曉陰有懷亡友王二雪蕉

夜潮喧達曙漠漠散春陰海氣昏南北鐘聲變
古今轉看鄉思減何故客愁侵歎息鍾期去空
餘山水音

登金山塔

虛空誰得住萬頃塔前奔孤日沿波轉遙天入
海吞端倪應楚越氣候豈寒溫赤縣神州意悠
悠何可論

極目非無岸滄波接大荒人烟沙鳥白春色嶺
雲黃出世登初地思家傍戰場咄哉天咫尺消
息轉茫茫

絕頂惟吾上忘懷達此生遠空微有映深水更
無聲只益江山迥寧聞世界平佛香吹廣漠一
接埽塵情

憑欄專眺聽指點忽悲歌歲月荒龍窟乾坤此
鶴河愁雲天畔起烟草潤州多遑復悲身事飛
霜滿薜蘿

長江頻失險孤塔自中流虎踞闕京邑烏棲俯

戍樓標題唐代警開鑿宋人羞一氣通衡霍諸
天袞袞愁

薄暮難爲狀空中別有聞懸燈江海合望月水
天分寥廓身何往飄零與不羣向來峰頂色看
作下方雲

北固

西郊諸嶺現北固稱其名石壁憑空下江天插
水生鳥飛孤閣半人上翠微平有處金焦合辭
山更遠行

宿北固山下菴此地昔年曾屯水軍

無事過三宿禪燈繼夕曛山空孤磬滿風便落
潮聞虛白頻疑月藤蘿直似雲如何岑寂夜忽
夢水犀軍

北固山逕同軫石

郭外空山妙途窮此逕存長懷金粟影高坐白
雲根水落添沙嶼煙消見海門忍看春草色的
的憶王孫

白龍洞梅

覓洞披榛入探梅傍虎行地偏鐘鼓寂春霽雪
霜生聞說人稀到能無鶴自鳴下方歸路晚暗

覺旅魂驚

山行訪梅不得到竹林寺

飲泉心未足出谷復何之欲問竹林路樵人亦
不知遠江雙鳥去落日一峰歆爲覺梅花近山
風故故吹

焦山

觸處迷人代茲山尚姓焦上頭仍棟宇到眼忽
雲霄樹色南徐近江聲北岸遙衣冠留洞壑不
必訪松寥

遠跡滄江曲山情實澹然石根爭插水樹杪欲

浮天莫起蒼虬卧端如處士賢再來應酌鶴把
酒坐高煙

出郭來差遠憑高望獨深江分神禹跡海見魯
連心密竹藏金像回流灌石林擬尋幽絕處却
誦白頭吟

摩碑臨積水折竹杖危坡不向山中住寧知幽
處多雪埋孤衲笠風亂老漁簑荒率存真意余
心不厭過

真州新城賦得十里桃花留別軫石前

民

倚棹望遙天明霞漲一川同驚分手日莫記種
桃年綠是江南樹青為渡口烟無勞更相送緩
緩問歸船

九日晚集因圃同韓臣作

重陽誰卜夜似為此林亭夕照潛通月光不
帶星深杯俱皎皎高柳故冥冥坐覺人皆醉疎
鐘報獨醒

晴

海角收殘雨樓前散夕陽行吟原草澤醉卧卽
沙場騎馬人如戲呼鷹俗故狂白頭蘇屬國只

合看牛羊

秋日同靜能前民上雞鳴寺後湖亭感

興兼懷蜀友范仲闇昔年晏集此亭

廢寺無僧住山光亦不親石門歌壞道風葉侮
游人直視毘盧面猶多戰馬塵霜鐘殊寂寂空
外吼何頻

樹力支危榭山形遶禁湖繇來天地意不厭白
鷗孤綺席人誰在臺城草自鋪好留明月照輦
路傍蘼蕪

雨

時前民將
欲別余

冬暄何可恃一夕起層陰落盡衰桐葉方知急
雨心暗停南浦棹寒折北齋琴鄰舍知幾早多
時響莫砧

北山啜茗

雪罷寒星出山泉夜煮冰高牕斟苦茗遠壑見
孤燈拾級瓢常潤歸房杖可憑下方鐘鼓發殘
月又東升

柘臯早發

早發柘臯鎮出門疑五更水田先作曉山路幾
時平後騎風相逐前人影漸明翻愁羣動起亂

我百蟲聲

天章酌我

久客防人面相看一友生秋深添酒味老至減
詩情荷葉幾時破草蟲行處鳴寒衣曾未寄心
反怯歸程

信宿燕磯山閣大雪逢初度作

雪光形水濁風力束江高曠野翻無岸中流豈
有舠南歸期又展東望首重搔悔負毘陵約長
歌散鬱陶

送五舅歸黃州

先母多兄弟今看一舅存無兒年八十有淚憶
孤村岐路真成別江帆不易論到家留白髮青
眼對乾坤

中秋讌李三友池

秋天雲日好何必盡晴空疎雨來無跡清尊趣
不同烟霞深薜荔燈火淨梧桐免被嫦娥見年
年羈旅中

蘇嶺書齋逢陳北固表弟卽送還里

潤別忘年代相逢道姓名一時中表會三紀故
鄉情晚節存高蹈歸帆過舊京後期方袞袞春

酒話長生

月夜重游焦山

勿論今宵月清輝白晝多秋聲行礪壑石骨照
藤蘿細響蟲侵鳥殘陽葉在波東方動光怪天
水盪相摩

石聳如雙劍交加山水邊上頭霹靂古下有蛟
龍纏四顧宜招鶴三更好悟禪月明無賴極化
作一江烟

月湧焦山寺潮來寺一低勢如騰塞馬聲欲亂
征鼙但益空山靜能祛客思迷老夫端倚醉歌

罷忽然啼

邂逅張子酒肆夜歸寺寓踏凍作

取醉尋歸徑坡陀折幾層山荒聞虎嘯江黑見
漁燈磔磔泥如石淙淙水是冰應須乘凍去詰
旦更南登

倦圃詩為秋岳賦

谿山真意閣前故對滄浪帖石雲生罅牽蘿翠
繞廊蕉深垂露重松老落花香意頗思鄰近村
西問草堂

幽栖寺

獨坐幽棲寺琳宮絕頂開烟巒侵北盡雷雨暗
西來遠色包滄海奇聲裂石臺遙知韋刺史喜
極把空杯

夏夜卽事同梅陌前民

暮雨阻歸客四更殘月涼醉醒人共起今古夢
皆荒山鬼卽蘿薜晨鐘驚渾茫竹虛風泛泛吾
欲憶瀟湘

秋日訪眉照上人用孟浩然義公房韻

三首 選一

客愁何所託戀戀此幽林眺聽秋聲滿淹留細

雨深吟情依淨域兵氣自窮陰江外逢蒼雪于
今念載心

乙巳清明日飲吳浮槎海棠下

芳徑過新雨海棠花半開主人留客醉童子得
魚回香細風飄幕絲繁影照杯佳辰如此度不
負杖藜來

贈魏子存 選二

分袂從隋苑尋盟到武塘如何江上客不返漢
之陽計拙違知己途窮入大荒故人憐屈宋此
地卽三湘

百端俱可置大事逼衰遲不見瀧岡表徒遭薦
福碑倦遊焉敢息塵跡豈能辭一笑相逢後中
心依舊悲

真棲攜錢過草堂酌我時余自滁陽返
真棲自武昌復來

破日秋光好荒年酒價平相逢沽一斗亦足慰
殘生我恨梅花落君悲漢水清鄉愁何必話鐵
笛作邊聲

落木菴同蒲道人啜茗

苦茗平生好逢師此共斟綠江無盡意白首有

同心山月照逾澹松風吹使深黃鸝知飲愜枝
上送佳音

寺樓雨中同亦史翼微來鶴桐初作

與客上高樓蕭蕭海雨愁甲兵全未洗行李又
須留烟合疑無樹山空但有秋此時同抱恨不
待話離憂

古樹

為四明丘氏作李杲堂記云家
亦有古棟樹與丘松栢相望

聞道三株樹崢嶸古至今松知秦曆短栢感漢
恩深用盡風霜力難移草木心孤撐休抱恨苦
棟亦成陰

遊山前後作

正月十三夜至瓜渚前民攜酒大觀
樓憶是早別軫石于郡城余以明日
過京口

令節吾何有危欄此暫憑客程看鐵甕鄉思豈
金陵人共中天月江分兩岸燈合離同日事西
望意飛騰

家信

不爨邗江日家書報絕糧途窮翻可笑事急豈
能忙老父思端綺飢兒寫數行出門須作計四

顧野雲黃

清涼山寺逢僧號掃葉者贈之以詩
掃葉幾時盡秋風秋雨多四山聲不斷一樹宗
如何定日閒同帚霜天靜養柯翻嫌丈室裏花
事惱維摩

聽軫石琴

入座含幽思三山屐始歸方將彈古調回復振
金徽予意尤耽此此音知者稀移時身不動親
叩海天扉

江雲飛不盡流水上空堂寂歷人誰在颼颼曲

自長哀猿吟雪嶺匹馬弔沙場

軫石少讀書白狐嶺常
夜聞猿過年頗歷邊郡

此意吾全識憑君鼓數行

月照彈琴手香傳入戶枝輕烟飛不著獨鶴步
何遲意得人皆靜玄來已不知曲終三歎息為
說昔尋師

新城書感示蔣子

客子無寒食荒郊駭哭聲看花詩不就如雨淚
先傾妻作他鄉櫬家辭故國塋良朋歌亦止知
我此時情

送軫石竺生返廣陵

四首

去住心難決，徬徨對僕夫。
破愁思女慧，失計怯鄰逋。
水路明晨發，山游異日孤。
交深全用拙，別後爾知吾。

策杖分襟地，旗亭濁酒杯。
秋風彭蠡鴈，春色嶺南梅。
不厭元侯笑，休教庾信哀。
殘年看射虎，亦足慰摧頽。

莫道來何事，應知得未曾。
龍沙風浩浩，雪窖水稜稜。
有淚看鍾阜，無冠拜孝陵。
舊遊君遍訪，昔夢總難憑。

盡失懷來意，萍蹤到岸分。
郭西居獨遠，天下事

寧聞弊俗歌，兼哭勞生怨。
且羣過江宜，洗耳聽說背嵬軍。

別興

半間傾倒屋，亦號讀書堂。
不厭千回埽，纔焚一瓣香。
晝吟分研席，夜卧共匡牀。
戎馬猶鄰近，真依避世牆。

茶喜

飲揚州某茶肆作

維舟折桂花，香色到君家。
露氣激秋水，江天卷暮霞。
南軒人去盡，碧月夜來華。
寂寂忘言說，心親一盞茶。

十二月十五夜至瓜渚宿魏氏榮露堂
與其喬梓卽席共賦

獨樹今爲客來敲月下門寒天猶逆旅落葉不
歸根冰雪春天盡江山戰後存銜杯慚已老未
敢議酬恩

送吳舫翁遊黃山

幾蠟靈山屐蹉跎四十秋丹臺初日湧黃海白
雲稠猿鳥看人賤漁樵入界幽君歸先報我將
擬作菟裘

懷山堂論詩

唐詩三變後吾意止中唐過此風斯下其他運
可傷含悲生石闕積憤滿書倉間氣惟忠信西

臺發古香

宋詩以謝翱爲
第一以後無詩

試杖戲作

今朝初試杖杖國是何年竹性同麋鹿

麋鹿
竹杖

花

時拜杜鵑甘隨東郭履不傍繞朝鞭甚覺爲龍
易何須慕稚川

鶴林杜鵑樓書感

鶴林何處好吾自愛重游有竹連三徑無人卧
一樓梅開春晝永山老杜鵑愁不復題名字書

生已白頭

元夕江樓看月 二首

星火夢瓜洲燈時得勝游難逢今夕月復此大江流碧浸三山影烟含萬古愁夜深誰擊楫吾道在漁舟

俱此耽明月何期落大星

見星隕如炬

徒能驚醉眼未

許亂青冥戰伐看前代江山想巨靈悲歌風乍起身世總無局

偶然小飲和王歙州

一蔬曾未設村酒復中之豈意飄零況能來絕

妙詞驪珠兄弟得馬角古今遲八月如三伏清

風吉甫知

前民生日

三十今過幾詩名孟浩齊道寧同我拙顏肯向誰低白髮循資到青錢取次攜飲塲行處好二月草萋萋

登燕子磯亭

和愚齋韻紀昔游情事

翩躚燕勢復岌堯宿槩來登散鬱陶天末雙丸輪赤白望中一氣接金焦鐘清野寺摩殘壘烟鎖江門上晚潮此地不須添感慨但將今昔問

漁樵

弘濟寺尋蒲菴

幾度維舟訪老僧
巉崖拾級又來登
飯抄雲子三春白
茗瀹秋江萬里澄
長恨南朝沉鐵鎖
何如西竺引金繩
元知世外多奇士
高築詩壇祀少陵

蒲公欲于山中
建一閣祀少陵

感秋

赫赫炎威燼不噓
一宵白露滿庭除
鍾山樹盡秋聲在
樊水波寒夜月虛
失國黎侯猶歎息
憂天杞叟付軒渠
殘年飽飯今難得
遑向天南望

鴈書

燕磯感舊

昔余遊鹿城諸同人攜紅裙某某
祖道于此今無一存感而賦之

坡陀山半結飛樓
壯歲曾叨餞遠遊
彩筆雕弓俱氣象
美人名士各風流
暮帆遙指青山峽
夕照斜通白鷺洲
惆悵一時消歇盡
獨張老眼望難收

為陶象庭將軍殉癸未寧前之難和東

坡先生韻

杏山師潰國無門
憤切戎衣點淚痕
自是挺戈無反顧
羞同坐甲有成言
黃沙塞冷靈旗遠
青

史名高廟貌尊七尺豐碑誰解作揮毫吾欲表
忠魂

輓曹秋岳

君才丁丑盛文章壬午論文在帝鄉一別再期
純涕淚兩登八座亦淒涼隴頭水咽疑人語粵
嶠猿啼斷客腸指點昔年遊宦地不知何處不
沾裳

日日論文意未宣還從別後寄長箋請纓策黜
餘何用諛墓金多但可憐紅板橋頭重握手南
倉渡口幾迴船元文罷刻關天意猶感忠言到

九泉

公欲刻元文
用余言而止

送王孫茂之廣陵于一子也

爍石燎原刮火屯何人剝啄響柴門慙慙喚我
聲猶昔卧起看兒眼倍昏故里有樓歌帝子殊
方無地飯王孫橫經家學傳三百只恐蒿莪漬
淚痕

登周處臺

半生老作金陵客訪古今登周處臺疎樹萬家
秋更落夕陽千里暗還開虛傳戰伐能揮劍如
此江山只舉杯寂寞草堂遙在目蒼茫指點朝

風回

雨中子任移樽寺寓同雪舫前民永清

淡洋賦

十日秋霖困老翁羈孤詎數阮途窮公卿奴僕
緣俱薄藥餌盤餐遇略同愧我褰裳思霽後多
君載酒自泥中臨行更許霜華贈硯北軍持幸

不空

子任離間
多名菊

乙丑季夏傷足伏枕歷秋未瘳屢荷素

園見顧殷殷偶留小酌賦答

吾道危如一木支誰憐雙足數還奇音幾呻吟轉

側今何地跋扈飛揚彼一時同調相期金可斷
異方多故藥難知留君小飲余先醉為愛西泠
七卷詩

越二日素園載酒過豐詩謝之

故人相報何其速擔酒如澗過草堂滿意千錢
羅紫蟹稱心三市選黃羊偕來僧曠能揚解侍
立童清解蕪香酬酢從今誰肯已須烹石髓酌
天漿

送秋之集再同鉉升練江南枝賦

終朝抱膝不成吟酒茗同歡任各斟栗里黃花

相問少孝陵紅葉向來深著書未究三餘業伏
枕空勞九塞心莫恨征鴻霜後杳遙遙至日有
佳音問卜許至
後全愈

又疊支字韻

少昊西行有別離草堂高會及良時年年祖道
身皆與歲歲鄉心老漸移三徑寒花彌姣好五
原秋草益淒其槩槎博望曾貽杖記得探梅子
細支

肥水先生忽有居

急流未必從君退且喜歸懷有定蹤去國八千

餘道路移家三十二芙蓉裁詩鶴唳林端月禮
佛人叅郭外鐘誼適館餐吾竊愧籃輿相訂屢
過從

楚客孤踪數往還朱門強半是柴關新栽竹始
開三徑大厦人先庇萬間只在秋江隨野鶴可
無烟樹看鍾山卜居已占東南勝為報先生亟
辨閒

前民草堂

濶別無端至五霜知君新有授經堂數莖白髮
環童稚一朶黃葵向夕陽書檢焚餘留漢史人

嫌衣敝免時裝興來欲話隋家事只學漁樵聚
蜀岡

南枝開士見懷依韻和答

遮莫長歌復短歌此身如葉久離柯情親飄泊
君難得老混塵沙我為何濯濯禪枝方內少芄
芄春草世間多應憐大蹇朋來日不惜芒鞋早
晚過

長干阿育王塔詩

塔尚未登

巖業長干塔莊嚴三百年向來俱草荆及此始
精堅大顯康僧會恢弘吳主權憑空收海岳拔

地半人天旭映鍾山紫燈齊象緯懸皇居由此

壯帝夢至今傳聖感誰舒眼

宋時名聖感塔

慈恩或比肩

果愚籠萬象寶網護三禪銅題金如草

塔頂為外國所貢風

磨銅價倍黃金

香臺玉琢蓮世尊悲下界迦葉笑層巔高

使雷霆鬪孤令風雨偏行雲時側睨滿月始平

圓鼻扇排瓊戶屢屢錯錦塵八欄鈴怖鴿九級

勢迴鳶頗困詞臣筆曾傾內府錢無霍華震旦

不二拱幽燕勝槩湖僧拜真形國手鐫祠猶鄰

木末門不對金川重整功都講新規煥大千鈞

心還鬪角豹尾復螭顛舍利光常住菩提樹隱

然登危須定力，覩瑞有竒緣。誰估琉璃價，應沉
鞞鞞船。報恩珠不細，開國鼎嘗遷。末法無真衲，
先朝有賜田。徒來揉目客，不見點頭篇。丹碧秋
增麗，虛無晝有烟。竦身思矯矯，寄想亦仙仙。目
力窮何際，心旌搖可憐。何當凌絕頂，一覽折中
邊。

乙巳臘盡還南寓戲為口號

淮水凍仍綠，鍾山燒更青。一椽來復去，只似短
長亭。

妻孥誤見嗔，我信如潮汐。出門必上元，還家必

除夕

酌天章

我有雙樽酒，將來飲故人。偶然鮭菜缺，厭說客
中貧。

梅下

獨坐歐梅亭，步繞歐梅址。不見歐梅花，且拾歐
梅子。

泰州絕句

窮海三秋盡，扁舟百里行。夕陽無近色，偏照遠
帆明。

移寓自嘲

十日如新婦不曾逾戶限
惟有庭前花來時才一見

為斯上人題

誰識山僧意
繩牀繪牡丹
分明將富貴
只作夢中看

淮陰送別徐松之

秀州分手楚州逢
兩地同聽古寺鐘
可笑淹留余失策
翻疑君去太匆匆

送龔孝升至燕子磯

送客停橈傍釣磯
江風初起浪花稀
一行霜鴈沙頭宿
留待孤帆出浦飛

青眼相看世所稀
辭君此地轉依依
長江南岸青山下
翻送居人策蹇歸

江干欲別更維舟
沽酒斜陽好滯留
直上燕磯高處望
青山白雪是神州

今夜

蕭寺孤燈雨滴苔
老夫一出旋歸來
呼兒且莫忙沽酒
今夜懷人不舉杯

梅花

數尺霜根幾載移一樽深賞向南枝平生只是
知慙愧逢著梅花不作詩

乙巳八月十六夜

中秋節後何妨雨卧聽蕭蕭掩竹關記得月明
潮欲上去去年今夜在焦山

佛殿

大樹風多葉盡飄莊嚴猶自見前朝黑頭江令
殘碑在不記君王舊姓蕭

壬戌初春訪朱林修偶成

春風扶杖遠相存新柳絲多罩一村前有梅花

後流水淹留容易到黃昏

題朱林修塵外樓圖

芳草無邊似綠江高樓臨眺客愁降向東一面
尤奇絕盡放鍾山入小牕

寶應阻水

透骨奇寒一夜生孤舟歲晚不勝情北風吹老
黃河凍遂有歸人冰上行

喬可聘

聖任陶菴江南寶應人

旅中得長子邁雲間消息

浪傳泛越州仍向雲間遊坐卧木蘭伴晨昏水

國秋書來垂舊淚人去對新愁望汝還家早憐
余病未瘳

苦雨

雨喜及時好那堪雲不開馬牛幾莫辨鷗鷺盡
飛來茅溼痕多漏沙崩響易哀田園生意盡排
悶強持杯

柘溪冬日舟中

鹿裘釣舫耐嚴寒抱膝長吟天地寬遠火疎鐘
夜半到蘆花楓葉病中看風來書展烏皮几雪
壓篷低紫籜冠惜少王維圖好景閉門僵卧似

袁安

月滿前村一枕寒孤舟老病帶圍寬翔鴻避弋
雲中遠野鹿忘機雪後看松徑霜鐘尋白社梅
花鐵笛夢黃冠懶乘深夜剡溪興敢向山齋覓
晚安

秋村寄吳柴菴

蕭條村舍挂藤蘿隱几閒吟秋興多荷芰爲裳
宜野艇鳧鷖之性悅清波涓涓明月舟虛受漠
漠孤雲溪靜過試與古人評隱逸五湖烟雨較
如何

宮偉鏐

紫陽組弦江南泰州人
采山外紀前入燕詩

感懷

幾回清夢到梅岡
驢背行游靜晚塘
逸客單車辭魏闕
羣公匹馬向河梁
天連楚澤吟芳樹
路轉淮陰駕短航
寂寞軟塵懷故國
自從桑海歎蒼茫

龔芝麓司馬招飲水閣

舊京芳樹自何年
客夢平蕪歲序遷
遂有好懷憑蕙葉
時移清影付花箋
千秋抗疏嚴檣杙
一夜吹簫泣杜鵑
遮莫彩雲容易散
遲君同上若耶船

耶船

春客長干王元倬招集陳階六寓園時

寇姬白門在座

子夜層樓消夢寒
一春心事向人難
才非救世官多誤
客有閒愁吟未安
腰帶半同青鳥瘦
淚珠時共美人彈
相逢擊筑吹簫士
握手離亭子細看

宿靜海南五十里

此去瀛海五十里
土人號曰唐官屯
夜過三鼓舟臨岸
犬吠數聲風打村
側聽既恐纜忽斷
驚

棲還慮盜頻煩龍舸簫管終遺恨輒喚黃頭聲
欲吞

黎遂球

美周廣東番禺人
蓮鬚閣集

擬古少年從軍四首 選一

夜宿河上沙日飲河流水河黃不照面心熱酒
發耳男兒漸有鬚安能悅女子不如老邊庭夢
我長暫美

俠士磨劍歌

十年磨一劍繡血看成字字似讐人名難堪醉
時視舊讐劍邊鬼新讐眼中淚倚嘯復悲歌啣

斷長虹氣不得語公孫阿世斯其志

劉生

劉生稱少俠十五事遨遊射鳥趙家路吹簫秦
氏樓龍媒花下馬狐腋雪山裘近佩將軍印開
筵選徹侯

答徐子能

春歸客頻望薄暮虎丘東高鳥不謀木落花翻
舞風雨晴山更出煙暗綠如空舒嘯還呼爾前
林一水通

孫奇逢

啟泰鍾元直隸容城人
歲寒居集

送費生南還

成都費密此度游燕趙間得余歲寒居集其尊人鮮民公閱之而有合也令其徒步事余于空山清寂之中余媿無以益此度而感鮮民公有知已之言于其歸也口占一首

若翁遺命令從游北地天南喜應求聞所聞兮
見所見歸攜何物慰冥幽

韋人鳳

六象浙江武康人

南山

家住南山下荒村只敝廬春風三徑草夜雨半
牀書石戶藤花合茅簷竹影疎溪邊堪泛棹欲
傍五湖漁

過太白亭弔孫山人墓

坐看萬嶺對斜曛策杖還尋處士墳一代詩人
今尚在千秋絕唱定誰聞荆榛斷壑流殘雪松
杪空亭捲暮雲莫謂高峰長寂寞摩碑猶自重
遺文

徐開任

季重江南崑山人
著有名臣言行錄

贈王太常烟客

曾侍先皇太乙壇昆明復見劫灰寒一樽陶令
猶思晉五世留侯未報韓擇地懶沾新雨露避
人還著古衣冠揮毫欲寫雲林意剩水殘山不
忍看

王應熊

非熊四川巴縣人
鵲夢稿

江上

城頭雲氣接江臯江上歸舟近復遙野客留看
罨畫景長年且繫木蘭橈紅燈竹葉非無分赤
壁仙人似可招嬉水眠烟得瀟灑便將生計混
漁樵

聽雨

客宵如水未成眠淮泗寒聲集枕邊雙栢搖烟
龍樹語千秋送響海潮連夢回紫閣窓前溜憶
入洪巖洞口簾漸向三峰記前句珮環泣落四

公泉

孫兆祥

泰階江南高郵人
五似堂集

禾已黃歌

國柄胡為歸大璫囹圄湯鑊闖忠良顛倒綱紀
民罹殃上帝震怒星生芒地軸撼城覆其隍伏
屍百萬魂飛揚青燐白骨化為蝗蝗兮蝗兮禾
已黃恩斯勤斯匪爾糧何不往嚙彼宵小之肝腸

卽事

謗篋一朝開孤臣絕塞來風迴鉦鼓壯霜殞節
旄摧鐵騎塵猶暗玉關人已回咸陽中夜月無

奈笛聲哀

秋水暴漲志感五首 選一

長堤泛泛水瀾瀾
斲向鷓鴣借一枝
棟插亂雲和雨漬
軒依濕葉任風吹
妄思九月新禾稼
那見三村舊酒旗
何日巢居人就日
索綯重復理茅茨

詠風中紙鳶寄懷東戍二首

征鞍萬里久從戎
帛信難傳鴈足空
擬向天涯問消息
琵琶一曲月明中

黃沙磧裏度春風
絕塞相思夢可通
不解紅顏

難却敵和雲吹到玉關東

顧祖禹

景范江南無錫人

送魏叔子還寧都

天地方涸寒君行涉江水
問君行何為抱膝深
山裏易堂好弟兄
事業寄文史
天空鷗鷺飛
日落雲霞起
遙望翠微峰
迢迢四千里
吾欲牽君衣
君行其少俟
好風從東來
揚帆疾如駛
山中正春光
寒香放梅蕊

甲辰九日感事

蕭颯西風動客愁
攜尊無處漫登樓
赭衣天地

驪山道白恰親朋易水秋征鴈南飛無故國啼
猿北望有神州茱萸黃菊尋常事此日催人易
白頭

王

烈 名世江南華亭人

烏棲曲

繡帳歡筵度紅燭北堂夜夜人如玉與郎同心
秋水頭感郎殷勤水不流

秋日家兄移居

樽前執手淚霑衣蘆荻蕭蕭木葉稀却恨不如
湘浦鴈江南江北一行飛

陳子升

喬生中洲廣東南海人

清遠峽

軒轅二帝子弄笛聞禺陽江岸扁舟客聞鐘到
上方仙靈今閨寂雲水空青蒼欲遣愁心去歸
猿聲正長

孫

治 字台浙江錢塘人

吳岱觀歸里

挂冠何處閉烟蘿乍會猶如夢裏過越水秦山
無處所長鑿短髮奈愁何十年未遂江南樂七
詠真成同谷歌 岱觀為成縣令
卽少陵同谷地 兄弟白頭相會少那

能交手卽關河

濟寧道中

湯湯汎濫愁無極
微禹為魚可奈何
水沒渠田無白草
天低大野晝黃河
流東謾說金龍塞
弘治二年
北望誰為瓠子歌
悵惘馮夷一輟棹
斬蛟恐致有驚波

決金龍口復衝張秋命御史白昂塞之

黃河口號

飛鷺立冰方啣雪
哀鴻叫野復乘風
鷺飛無定或西逝
我欲依鴻只向東

